

江陰縣志卷之十六

人物一

延陵季子以紹至德見重於聖人而終老是鄉流風餘韻賢哲代興或以功名事業顯名於當時或以氣節文章傳名於後世以及道德淵懿煙霞痼癖者流何時蔑有彙而錄之都人士之儀型固在是也守土者之景仰豈外是歟志人物

崇祀鄉賢傳

周吳季子札吳子壽夢第四子壽夢以札賢欲立之札辭不受退耕延陵之野事詳春秋傳及史記吳世家其卒

江陰縣志

卷六

人物

鄉賢

一

也孔子書其葬處曰嗚呼有吳延陵君子之墓在縣西三十里之申浦

漢彭

修

事蹟見後漢書

道光二十一年奉文入祠

前宋吳欣之元嘉末弟憫之爲武進縣吏隨王誕起義元凶劭遣華欽攻之吏人皆散憫之獨見執將死欣之詣欽乞代弟命詞旨哀切兄弟皆免齊建元三年詔旌之

宋陳思道旣喪父事母兄以孝弟聞鬻醯爲生母病思道衣不解帶者數月母喪水漿七日不入口旣葬廬墓悲慟晝則白兔馴狎夜則虎豹環廬而臥其妻時攜兒女詣之拒不納咸平初賜束帛旌其門

葛 宮字公雅大中祥符壬子進士授中正軍掌書記善屬文上太平雅頌十篇真宗嘉之召試學士院進兩階知南充縣值東川饑部使者檄守資昌兩州以惠政聞知南劍州土豪彭孫聚黨憑山澤爲盜宮遣沙縣尉許杭諭降之並溪多產銅銀吏挾奸罔利課歲不登宮一變其法歲羨餘六百萬三司使聞於朝論當賞宮曰天地所產吾盜之又可爲功乎徙知滁秀二州秀介江湖閒吏爲鬪涇瀆上以征往來有婚葬趨期者多爲所阻宮命撤毀之歷官工部侍郎著青暘集二十卷

葛 密字子發宮弟慶歷壬午進士爲光州推官豪民李江陰縣志

卷六 人物 鄉賢 二

斯殺人嫁其罪於邑民葛華且用華之子爲證獄具密得其情出之仕至太常博士年五十請老或止之笑曰俟罪疾老死不得已休官安有餘裕哉卽退居青暘之上湖自號草堂逸老著上湖集二十卷以子書思贈通議大夫

葛書思字進叔密子熙甯癸丑進士爲建德主簿時密已老欲迎之官密難之書思曰曾子不肯一日去親側豈以五斗米移素志哉遂投劾歸養十餘年近臣表其志行以爲泗州教授不就密不得已許以他日偕行始乞監新市鎮居父喪哀毀骨立盛暑不釋苴麻服終不忍

去冢舍後官至朝奉郎徽宗朝特詔謚清孝著安遇集
十卷紹興閒以曾孫邠追贈太師溫國公

王 令字逢原籍維揚遷江陰常作孟子講義與王介甫
詩文往來而守正不阿介甫重其志行謂爲學君子而
不已者也卒時年二十八介甫誌銘其墓

蔣 靜字叔明本宜興人因內父劉谷居江陰第進士調
安仁令俗好巫疫癘流行病者雖死不服藥靜悉論巫
罪毀淫像三百軀投諸江知壽縣奏罷乾蜂之貢有旨
減其六知陳畱縣與屯將不協罷去徽宗初立求言靜
上言多詆元祐閒事又獻瑞烏頌士論少之繇職方員

江陰縣志

卷六

人物

鄉賢

三

外郎遷國子司業帝幸太學命講書無逸篇進祭酒爲
中書舍人以顯謨閣待制知壽州徙江甯府茅山道士
劉混康以技進其徒倚爲姦利奪民葦場彊市廬舍訟
至府吏不敢治靜悉抵於法徙睦州移病提舉洞霄宮
越九年召爲大司成出知洪州後告歸加直學士卒年
七十一贈通議大夫著寂照堂集

葛勝仲字魯卿書思子紹聖四年進士調杭州司理參軍
林希薦試學官通詩書禮三經及詞科俱第一除兗州
教授入爲太學正上幸學多獻頌勝仲獨獻賦上命中
書第優劣勝仲爲首差提舉議厯所檢討官兼宗正丞

遷禮部員外郎權國子司業時朝廷命諸生習雅樂樂成進一官遷太常卿宋自建隆至治平所行典禮歐陽修嘗哀集爲書凡百篇號太常因革禮詔勝仲續之增爲三百卷詔藏太常及建春宮以勝仲兼諭德勝仲爲仁孝學三論獻之太子復采歷代太子善惡成敗之跡日進數事詔嘉之徙太常少卿除國子祭酒尋知汝州李彥括田破產者眾勝仲請蠲不當括者彥怒劾勝仲上寢其奏改湖州尋徙鄧州朱勔先求白雀之屬勝仲不與至是媒槩其短罷歸建炎中范宗尹爲相凡前以朋附被罪遠貶者咸赦還復知湖州防盜賑飢皆有功

江陰縣志

卷六

人物 鄉賢

四

紹興元年丐祠歸十四年卒年七十三諡文康子立方官侍郎孫邲爲右相自有傳

吳 範字執侯大觀政和間詔舉八行閭里以範應守志不就子仲基仲達皆第進士太后回鑾封範承務郎嘗出貲建縣學東廊十五楹士皆頌之

呂天策字彥發隱居不仕善詩尤精於書法體兼數家有石刻十卷藏於家政宣閒書學方興被詔不就人號曰呂詔君

曹 密字宗山連之子以文名世第進士仕至朝奉郎江陰廢郡爲縣屬毘陵舊無產稅則例民輸丁鹽錢視他

縣獨倍力請均之郡從其請人皆德之所著有苕溪集
鍾山集抱關前後集論語注十篇又子格哀集彙次刊
成戲彩堂稿二十卷樓鑰戴溪爲之序格至中奉大夫
葛立方字常之勝仲之子第進士有文名以郎官攝西掖
忤秦檜奪職後仕至吏部侍郎所著有歸愚集五十卷
外制集五卷西疇筆畊五十卷韻語陽秋二十卷方輿
別志二十卷以子邈贈太師許國公晉越國公
曹 岨字巨山朝請郎球之子第進士自京口分教受知
於節使李寶辟置幕府移檄山東皆其文也詞氣激烈
軍中感動特授左宣教郎終饒州通判

江陰縣志

卷六

人物 鄉賢

五

耿 秉字直之紹興庚辰進士歷官兵部侍郎兼給事中
終煥章閣待制厲操剛方律已清儉所至以利民爲事
兩爲浙漕始以江陰軍認納和買絹匹不堪乞令臨安
府以酒息輸代繼奏本路數邑版賦之重獲蠲減以萬
數申請役法六事遠近遵之其在臨安百姓立美政廟
以祀知廣德軍值歲祲發常平倉活飢民萬餘自劾矯
制之罪朝廷特加獎異著有春秋傳二十卷五代會史
二十卷

呂

棐字元忱紹興三十年進士仕至朝議大夫監察御
史始爲岳渚法掾擅發常平倉賑飢爲當路所知編光

廟寬恤詔令又進寶鑑論二卷請法藝祖

邱 密字宗卿隆興癸未進士爲建康府推官丞相虞允文奇其才奏除國子博士賜對言恢復之志不可忘恢復之事未易舉宜甄拔實才責以內治遵養十年乃可議北向時方遣范成大使金祈請陵寢密言汎使亟遣無益大計徒以驕敵遷太常博士出知秀州華亭捍海堰久廢鹹潮壞田蘇湖皆受其害密奏剗築隄三州舄鹵復爲良田知平江府召除戶部郎中遷樞密院檢詳文字被命接伴金使之賀生辰者金正朔與宋不合告以南北異同合從會慶節正日隨班上壽金使屈服孝

江陰縣志

卷六

人物 鄉賢

六

宗喜謂密曰成禮而還卿之力也光宗卽位除四川安撫制置使兼知成都府密素以吳氏世執兵柄爲慮陛辭奏曰臣入蜀後吳挺脫至死亡兵權不宜復付其子挺死密奏乞選他將代之遂革世將之患其後韓侂胄復以兵權付挺子曦曦叛人乃服其先見甯宗卽位赴召以中丞謝深甫論罷之尋復職知慶元府韓侂胄出北伐議示密知密平日主復仇冀可與其功名也密曰中原淪陷且百年在我固不可一日忘然兵凶戰危未可僥倖以誤國進敷文閣學士改知建康府將行侂胄曰此事姑爲遲之密因贊曰惟無搖於異議則善矣陛

寶文閣學士江淮宣撫使時宋師克泗州密欲全淮東
兵力爲兩淮聲援奏泗州孤立淮北所屯精兵幾二萬
萬一金人南出清河口及犯天長等城則首尾中斷莫
若棄之還軍盱眙從之金人自渦口犯淮南或勸密棄
廬和州爲守江計密曰棄淮則與敵共長江之險矣吾
當與淮南俱存亡益增兵爲防進端明殿學士侍讀尋
拜簽書樞密院督視江淮軍馬有韓元靖自北來自謂
琦五世孫詰所以來之故元靖言兩國交兵北朝皆謂
出韓太師意今相州宗族墳墓殆不可保語畢始露講
解意密以聞先遣王文采持書幣以行金帥答書詞順
江陰縣志

卷六

人物 鄉賢

七

繼遣陳璧充小使璧言金人詰使介旣欲和矣何爲出
兵眞州以襲我密請朝廷移書續前議且謂彼誦言以
用兵出侂冑謀若移書往宜暫免係銜侂冑大怒罷密
侂冑誅起江淮制置大使兼淮南運使招集邊民二萬
號雄淮軍未幾以病丐歸拜同知樞密院事卒謚文定
著有忠定集十卷拾遺十卷

胡 瑑字叔章隆興癸未進士清約廉介歷三朝由六察
陞諫官論事剴直終中奉大夫寶謨閣待制

葛 邈字楚輔少以蔭授上元丞會金人犯江上元當要
衝邈不擾而事辦後登隆興癸未進士除國子博士輪

對論州縣受納及鬻爵之弊孝宗獎諭除著作郎歷正
言首疏以畏天愛民爲先又論茶鹽酒稅歲增之害詔
令條陳邇以六事對皆切中時弊除侍御史論救荒三
事遷中書舍人歲旱求言邇大畧謂虞允文制國用南
庫之積日以厚戶部之入日以削罷兵以來諸將皆以
賂得遷其勢必至培克取償宜精其選遷給事中光宗
卽位勸上專法孝宗正風俗節財用振士氣執中道恤
民力選將帥收人才擇監司明法令上嘉納除知樞密
院事紹熙四年拜左丞相專守祖宗法度進薦人物博
采公論未期年除觀文殿大學士知建康府改隆興請

江陰縣志

卷六

人物 鄉賢

八

祠甯宗卽位上疏言今日之事莫先於修身齊家結人
心定規模判紹興府簡稽不遺巨細嘗曰十二時中莫
欺自己改判福州道行感疾加少保致仕卒贈少師謚
文定配享光宗廟廷有文集二百卷詞業五十卷

王甯字德和三魁鄉薦乾道丙戌中乙科終中奉大夫
直徽猷閣逮事三朝凡所敷歷綽有休聞有笑菴集十
卷

趙夢極字子中官大中大夫給事中開禧初輔翼東宮因
論兩浙身丁錢絹重爲民困轉以上聞御札亟賜蠲放
人多德之

吳 竽字允成第進士敷歷中外所至有聲祕書陳耆卿
稱其目如電采筆如川駛所交如葉水心適陳龍川亮
皆相器重終太府寺丞子行可當可皆以儒科擢第
吳當可字時文竽仲子開禧乙丑進士官至司農少卿忠
言直節名重一時晚歸鄉里徜徉林壑觴詠自怡平生
喜獎後進郡之名士多出其門著補劄叢稿

王呈瑞字莘夫第進士辛未南省第九人終太湖宰著易
膚其後有楊端叔字子正第進士丁丑南省第四人終
江東憲幹有白嬉集靳更生字春伯登庚辰進士第終
海南教授有南華經解二人皆以文鳴

江陰縣志

卷六

人物 鄉賢

九

趙 發一名良發字達甫嘉定癸未進士第三人端平初
上欲除發諫省會當國者先遣所親諭意發謝絕之命
遂寢終祕書省校書郎工部郎中胡鏗狀其行曰和而
肅介而通不容容以全不矯矯以異蓋粹然君子儒也
可謂知言

胡 鏗字伯遠嘉定癸未進士知寶慶府爲工部郎中學
有根本以四書爲實用一室蕭然凝塵滿几處之晏如
嘗有詩云貧居三不往薄宦兩無求三不往謂州郡富
室時貴也兩無求謂薦剡財利也

包天麟字仁甫孝肅公拯裔孫也咸淳四年舉博學宏詞

科入元避世著書有易書詩春秋四經傳義行世累徵稱疾不起詔旌其門曰耆德年八十三而卒手未嘗釋卷邑人號其村曰文林卽今文林鎮所自名也宏治中邑人張簡上書當事請祀鄉賢嘉靖中崇祀子植樸俱甲科植任府學教授善訓誨士子陞樂清縣令見郡志名宦樸任浙江儒學提舉贈天麟如其官

元陸 屋字仁重父煥宋末爲江陰軍安撫副使乙亥丙子間江浙盜蜂起煥招民義捍鄉井屋實左右之至元間伯顏兵南下屋時未冠造軍門與伯顏論議兵遂不入境奏授江陰軍判官累官海南廣東道廉訪使所至

江陰縣志

卷六

人物

鄉賢

十

夷其豪強貪墨褫職者數十人有以簫鼓迎神聚眾至數千人杖其首而投土木偶於江發奸摘伏咸以爲神始在新安有爭葬者各指一冢莫知日月久近屋視之謂曰必發而冢爭者色變懼亡去驗之果虛冢也吏解官錢止驛舍兩人與俱稱錢被盜屋召在行者詰之獨指其一贓具在或問何以知之屋曰吾覘其容止耳及在湖南有婦獨居夫久不歸或誣婦與僧有謀指道旁死人爲證屋疑死人夏月冬衣乃破僧械畱獄中明年夫歸獄乃白屋性至孝治家有法立義莊設義塾患民役不均多至破產屋立約先自所居化成鄉分戶九等

各出助田若干歲入之粟輸一人掌之歲終會其成既羨餘別買田而各歸其所助行之二十年一鄉之中無病役者卒贈嘉議大夫上輕車都尉吳興郡侯諡莊簡宋仁輔歲貢生仕東流縣尹平江路府判致仕平生不營家計草屋三椽棲遲終老若無名爵者

繆鑑字君寶號苔石居江陰之瓠岱橋棲遁高尚不樂仕進耽吟詠所著有效顰集行世楊維禎與陸文圭舉似其詩謂可次渡江後三詩家之餘響如家況云雁沈秋驛雨雞送曉窗燈遣興云門因好客時時掃窗爲看山面面開皆傑句也

江陰縣志

卷六

人物

鄉賢

十一

陸文圭字子方幼穎悟讀書過目成誦終身不忘博通羣籍及天文地理醫藥算數之學宋咸淳初年十八以春秋中鄉選宋亡隱居城東學者稱之曰牆東先生延祐設科有司強之就試凡一再中鄉舉文圭爲文融會經傳縱橫變化莫測其涯際東南學者皆宗師之朝廷數遣使馳幣以聘以老疾不果行卒年八十五爲人剛明超邁以奇氣自負凡天下郡縣沿革人物土產悉如指掌先屬纊一日語門人曰以數考之吾州二十年後必有兵變慘於五代建炎吾死當葬不食之地勿令封樹庶無暴露之患其後江陰亂冢墓盡發人乃服其先知

有牆東類彙二十卷邑中金石之文多出其手筆詳元史賀志云取秦漢唐宋以來文章係民彝世教者類編爲書五十卷名師宣堂文

俞弈曾字仲山家故饒興臺阜隸仰給門下者甚眾弈曾獨被儒者服折節交當世士江浙亂鎮邑爲墟弈曾改築環堵室於故居西偏一榻容膝焚香默坐四十餘年不至城府貴遊莫得窺見喜異書至老校讐不倦著有空谷吟稿

俞遠字之近弈曾子居空谷里人稱空谷先生身癯神骨秀竦好讀書隱居教授有質疑義者應之若響里中

江陰縣志

卷七

人物

鄉賢

三

子弟承遠教揖讓進退與爲詩文皆有法度遠生長兵餘築土爲室掃地爲席而於古誼甚篤故人孫帖自常來歸均衣食奉之晚得廢疾家人或出諄語遠曰孫帖先生貧而歸我何忍以疾棄之歲大祲耕傭病將死家人迫令去遠曰使舁歸而死豈不以舁故死之乎且若素事我今病而歸之非人情也未幾死棺衾殮之著有豆亭集學詩管見行世

許恕字如心家北郭故號北郭生能詩尤長古體思深旨遠論事多激昂部使者薦授澄江書院山長不樂卽棄去浩然自得與山僧野子相往還人莫識也恕少有

志才能自樹會天下多故因去之海上慕韓伯休爲人
旁通其術所著有北郭集行於世

杜友開字陽父授徒自給妻吳辟纁助之天厯間災荒學
徒散去朝夕不給吳昆弟屢勸斬邱木鬻墓地可少延
誓不可繼欲挈吳歸吳曰夫旣盡孝妾獨不能以義自
處乎竟窮餓相繼死王逢爲作雙連環歌

梁 益字友直本閩人至元間父國柱任常州路教授來
遊江陰遂家焉益於至正辛巳舉江浙鄉科明毛鄭詩
通春秋文辭根據典雅郡中金石傳記皆出其手其教
人以變化氣質爲先自陸文圭卒浙西學者多從之遊

江陰縣志

卷六

人物 鄉賢

三

著有三山稟詩緒餘史傳姓氏纂詩傳旁通

單濟之字君濱乙亥之亂里寇竊發燬其家父兄皆遇害
濟之挺身出救寇亦縛而焚之火半救至脫身獲免早
夜思復讐糾合民兵擒賊磔之讐旣復遂闔門謝客非
慶弔不入城市不喜與富貴交騶騎闖門輒避匿不見
年垂七十卒屬纊之夕索筆賦詩云人皆有死我豈獨
仙霧散雲收白月在天

吳 方字季仁宋八行先生範七世孫受學陸子方之門
諸子百家靡不究延祐中有司薦爲處州學錄不就自
號懶庵居士家非甚豐而樂賑人之窮蔡港務官虧稅

錢一千三百緡將鬻女以償方爲代輸其人請以女備使令拒勿納寓官有受代死無所歸者方適自治壽藏讓其地葬之金華黃潛銘其墓曰動人者義澤物者仁時以爲知言

李辰字吉父家貧力學有志操縉紳交薦其才召試迪功郎史館編校改參制置司幕府事以母老歸養數年母卒衰經不釋寢苦蔬食廬墓六年絕意仕進鄉邦賢之

李士龍本汴人父爲江陰軍吏因家焉士龍讀書知大義精武藝以先鋒從丞相脫脫南征有功官睦州同知兼

江陰縣志

卷六

人物 鄉賢

古

義兵都元帥撫農閱兵民賴以安長鎗氏掠地至睦士龍率所部擒斬之寇兵益至力不敵有以敵號遺之者斬以徇及勢不可爲取槩植地曰吾報主盡矣勿令敵斫吾頭遂倚馬仰藥瞠目而逝年二十五

王逢字原吉居黃山自號席帽山人其後避地松之青龍江以祖母徐手植雙梧於江陰橫河上不忍忘又自號梧溪子初至正間江陰盜起陷城邑東鄉之民多脇從浙東帥觀孫克復欲屠之問於逢逢曰民非好亂無父母耳帥悟民皆得生無錫民罹鋒刃者逢收其骨瘞之當事交薦逢茂才異等皆以疾辭僞吳張士誠辟之

不就明洪武中郡縣交辟皆不就著梧溪集題詠多亂
離時忠孝節烈事足稱詩史云

明孫 作字大雅一字次知門人弟子以清尚先生稱之
而不名著書十二篇號東家子江西饒介之負才不輕
與人獨喜其書曰勉成之會有識者至正兵起挈家三
吳閒盡棄他物唯載先世藏書兩敝篋而已太尉張士
誠聞而廩祿之卒以母病謝去久之眾爲買田築室寓
於淞洪武癸丑朝廷議采天下士纂修天文書時學士
宋濂與總裁求士於禮部尙書牛諒諒首以作對因薦
入詔與編修越六月書奏例除翰林編修官以老病乞

江陰縣志

卷六

人物 鄉賢

五

外授太平府學教授三年陞國子助教又明年陞國子
司業前後八載皆儒官作器宇凝靜通亮過人與人交
初若秋霜不可狎久如冬曦不忍去雖或以是非相煽
惟自切責不以怨人性無雜好惟著書自怡宋潛溪先
生得其圖說答性難等篇極爲推許以爲王魯齋金仁
山許白雲諸公未知孰先後也

張 宣端之子字藻仲讀書過目不忘十歲能詩文旣長
益肆力於學楊山居鐵崖二公文采名天下得其詩大
嘉賞一見爲忘年交洪武初徵授翰林院編修深被知
遇明祖呼爲小秀才知其尙未有室特命歸娶宋濂爲

序送之後謫濠道卒所著有春秋胡氏傳標註五經標
題青陽集皆未及行行者惟四書點本畱刻郡庠其春
秋胡氏傳標註鄱陽周伯琦爲序謂其潛心研采羽翼
文定之學云

黃 常字叔彝與同里包英惠連並以博洽聞洪武初舉
明經不就隱居游鯉山後薦爲本府訓導三月卽歸復
調建陽主簿著宏書七十二章小學通義十卷

趙 鉉字文鼎元至正間祖琦父思善聚眾禦賊見執不
屈賊怒盡殲其族鉉方六歲與母吳匿姑夏節婦家賊
跡之又匿舅氏吳士益家賊復購之急士益挈其母子

江陰縣志

卷六

人物 鄉賢

六

依杭州外姻方氏會杭州大擾母子遂相失其姑亦避
兵蘇州有義僕承信者聚趙族斬賊報仇復於杭州求
得鉉還夏姑育之後僞吳平鉉歸語及母輒涕泣不食
一日棄家出曰吾不見母誓無歸也歷走吳越數十州
不獲後於會稽遇鬻牛者周安道於旅邸言狀求得於
鄞之畫錦坊蓋母子隔絕者十有八年矣奉母歸又十
二年終宣德二年旌孝

孫 亶字叔誠以歲貢生由戶部主事知鞏昌地邇西陲
亶至至誠率物興起士風先是西戎時入剽掠聞亶名
稍稍歸服值歲饑民耕缺種亶解袍帶易蕎麥百斛與

之種歲仍大熟了內艱歸軍民乞畱詔起莅事如故秩滿郡民復請畱詔進秩嘉議大夫仍治鞏昌平生慷慨有大志事親孝休益力凡三十年不離鞏昌平生慷慨有大志事親孝休於家者八年居恆未嘗一至郡縣門及卒篋無餘物

嚴 本字志道本崑山人僦居江陰遂占籍焉家故貧爲童子師得斗粟尺布躬負歸養父喜讀書取五經諸史之要者丹鉛之以識心得以儒士薦任刑部主事遷大理寺正時法網密獄吏文致多以故縱及大不敬爲擬本爭之曰國家定律除叛逆外別無故縱之文卽不敬所犯殊科安得一概重比傷聖朝明慎至意得條著爲

江陰縣志

卷七

人物

鄉賢

七

令其他平反甚眾尙書宋禮奉命採木於蜀本輔行烏蒙蠻初見漢官徒眾驚疑負弩至禮愕不知所出本從容諭以朝廷威德蠻眾懼服叩頭去居官清峭然未嘗自廉而污人曾奉使督辦於太平僦居僧舍有懷金誤投本所者笑卻之卽日徒舍故事督辦後期者例罰工作本不忍急責民寓書其子鬻田爲工作費安慶鄉民七人夜漁於河竊民舟米軍衛邀功抵以強劫重辟本一訊知其冤改以杖徒有御史陳旭子與鄉人同飯於肆俱爲邏者所獲蓋鄉人前爲盜劫人事覺而逃餘黨七人已棄市鄉人旣就繫懼拷掠誣引御史子同盜且

分之贓案具而鄉人死御史子無以自明謬以其母簪珥爲贓本閱案見前七人招服未嘗有御史子及召事主驗所入贓非其物疑而問之其子號痛稱冤公將直之同列皆謂成獄久不可改公曰御史子有冤而不得白執法者能無慚乎乃獨署其案聞於朝而釋之又良鄉民失馬疑其鄰盜之執告於縣縣丞亦以爲可疑因拷訊過重而死法司坐丞決罰不如法當徒而又坐告者以絞公曰因公殺人罪丞當矣告者因疑而訴豈可坐以誣告致死哉所擬則似丞與告者各殺一人矣遂駁正而活告者蘇州衛卒十餘人駕舟運餉泊河西務

江陰縣志

卷六

人物 鄉賢

六

夜劫客其中一人爲事主所殺餘黨懼事覺無以自飾見鄰舟有押解人帶兵仗防囚而行者因謬指押解人劫商財謂其侶往救而被殺擒報於官皆誣服本覽其贖疑之曰押解人與囚同舟借使爲盜囚必知之駁令驗問果得其實遂釋押解人而正盜之罪其他事尙多而數條活人於死爲最著翰林張洪長史周忱爲傳見戒庵漫筆安成李時勉送嚴大理序有耿介不阿犯顏據正廉潔不污用法平恕勇於爲義不計利害履行堅確議論慷慨之譽著有律疑解畧刑統輯義兩書

顏

澤字澤民永樂壬辰進士授鎮遠府知府府新設民

多梗化澤因俗爲治奏請立學其化大行陞福建布政司參議

徐 晞字孟初永樂中由縣掾吏入仕初授繕工司都事歷工部郎中英宗卽位陞兵部右侍郎奉命簡閱陝西臨洮諸衛軍士尋以邊警佐甯陽侯陳懋鎮甘州正統初召還實授右侍郎復往鎮涼州莊浪諸要害晞奏請建學立師以揆文教尋轉南京戶部左侍郎歲辛酉征麓川命晞督饋餉賊謀閒道掠糧晞訓勵土官出兵擊破之餉道以通凱還晉兵部尙書充殿試讀卷官丁丑乞致仕卒遣官祭葬

江陰縣志

卷六

人物

鄉賢

九

黃 敏字叔才正統中繇貢薦任興化府經歷潔廉自持人不敢干以私嘗督造戶口食鹽冊驗丁論稅立法有方莆田縣丞葉謀舞文厲民敏以事械治之後爲丞所誣罷歸莆人立碑北郭門外

張 機字子樞自號澄江懶漁所爲多隱德事常作畱耕堂以示志吳門高啟爲作澄江懶漁說

顧 琳字汝玉少治春秋善屬文父伯常舉鄉試歿於寇琳始十歲問其母曰大人安在母語之故因慟哭復讐乃白其狀於縣事聞朝廷正統庚申以貢仕南大理寺副疑獄盈案片言立決不徇權璫王振請託已巳之變

琳在任鬱鬱作詩貽廖忠愍有託事致諷之義時薛文清官大理見而歎之曰國家養士百餘年僅見此耳密薦爲左寺正有徐王者爲內臣所誣坐斬琳核駁至再竟釋之玉父懷金來謝琳正色卻之曰顧法如此豈私汝邪同官惡其異已使人論其縱出琳繫獄數歲日讀陸贄奏議不輟南臺蕭惟禎馬文昇抗疏辨之適英廟復辟事罷仍舊官未幾乞致仕家居十五年闔門讀書口不及世故暇則芒鞋布衣徐步溪谷之間其言曰三徑黃花隨意玩半竿紅日放心眠此可以識其概矣比卒鄉人私謚曰節菴先生著鄉田集平反錄羅志謂操

江陰縣志

卷六

人物

鄉賢

三

行孤騫正言不詭近代人物宜首屈指

卞 榮字華伯年二十中正統乙丑進士歷官戶部主事員外郎常奉命簡戎馬南畿監稅河西務幹辦金沙洲所至皆能其官善爲古詩歌客京邸卷冊填委几上每退食輒磨墨泚筆頃刻數十篇既告歸居陶城私第讀書不倦閒入城城中好事人爭先迎致蓋自大江以南南抵越北抵吳無一人不知榮無一家不蓄榮篇什者善飲酒廣筵招之不可得遇知己則竟造索酒或至夜分達旦亦未見其號呶傾側也年六十九卒葬崇壽山有蘭堂集行於世蘭堂其自號也

李琨字德嘉成化乙未進士授行人遷監察御史巡按山東羣盜聞風解散奉勅兩廣檢勘公事風裁凜凜時臺臣有冒寵久任納賄鬻爵者琨抗疏劾免之直聲大震未幾卽世琨性質實不詭隨常慕漢暴勝之爲人至城府一謁守令後畧無陳託姻黨或干以事輒謝絕之陶廷威宏治六年進士授南京戶部主事卒於官本姓屈名震廷威其字也少孤鞠於舅氏陶祺遂蒙其姓復宗恐傷舅氏心不忍悖負遲之而後復爲人和易朴質與之處如其家人骨肉居無復設防畛云

薛格字平甫弱冠領成化庚子鄉薦宏治癸丑成進士

江陰縣志

卷六

人物 鄉賢

三

改庶吉士時閣試中秋無月格詩有云關山有調空聞笛烏鵲無聲倦倚樓稱爲警句授簡討以養親乞歸三年卒初在史院時內廷發小璫聰慧者數人令教習疑難字劉瑾與焉格見瑾語言狀貌語同官曰此奴無善相應叱遣之王孺人與聞此語格沒後瑾專權猶念及其子檄府招之王孺人曰爾父當日深惡瑾莫若避嫌遠害遂辭不赴

王格字文弼號懼齋篤志好學籍有時名宏治壬子領鄉薦就選南京工部司務時逆瑾用事仕途險媚格堅執素志不緣禍福少阿凡厯再考士論謂其問學有源

清介不苟己而擢南京刑部署員外郎尤留心欽恤平恕詳慎權貴無敢干以私者前後在司屬九年乃引年致仕歸生平足跡不入公府端慎簡重不以色親人有古君子風子莘成進士見政績

湯 沐字新之宏治丙辰進士授崇德令崇人爲立生祠擢御史按山西舉彈無所避遷湖廣按察司僉事值逆瑾擅政怒不已附斥爲武義令瑾敗起爲廣東僉事理鹽政釐剔奸蠹不畏強禦厯官浙江廣東布政使貴州四川巡撫其在浙毛九寇孝豐在蜀芒部寇松潘皆討平之內召大理寺卿值欽明大獄起上意有所主沐昌

江陰縣志

卷六

人物

鄉賢

三

言曰律令高皇帝所定臣死不敢縱舍用是三奏讞三不稱旨免官家居六載廷臣交薦不起孝友天植性廉介通籍三十餘年僅有竹莊數畝世廟嘗書額賜之一曰存敬一曰處之泰然卒贈工部侍郎諭賜祭葬

貢安甫字克仁與父斌同舉應天宏治丙辰進士令長垣擢御史慷慨敢言時張鶴齡怙寵驕恣安甫抗章劾之武宗嗣位考功楊子器以山陵事下詔獄疏救之劉大夏請老疏畱之逆瑾擅政劉健謝遷相繼引去安甫草疏與南給事戴銑等力爭瑾怒矯旨逮訊鎮撫司收錦衣獄會主事王守仁疏救廷杖發編戶直聲動天下瑾

誅詔還官不起再以薦起山東僉事不三月引疾歸性負骨鯁正德中見時事不可爲輒裂眦出血叫呼不已居家以孝友聞

黃 昭字明甫宏治丙辰進士授刑部主事改兵部職方司正德初逆瑾擅權抗節自守瑾怒罷之瑾誅起廣東按察司僉事晉福建按察司副使理屯鹽戎務疏剔宿蠹披呈隱匿黃田山寇嘯聚有司莫能制聞昭往擒相率散去城門卒葉元保倡亂昭行間謀擒首惡亂遂平方考績聞母訃卽日冒雨跣行奔喪歸生平扶植人倫善獎後進口未嘗言人過工吟詠尤長古文

江陰縣志

卷六

人物 鄉賢

三

史良佐字禹臣宏治己未進士授行人擢御史正德初與貢安甫等劾逆瑾下詔獄拜杖削籍還無以爲家依高賓兄弟居因號借山居士瑾誅起雲南按察司僉事晉副使平十八寨叛苗濬滇池海口得農田千頃告歸二十餘年卒著有雲壑吟藁

高 貫字曾唯與兄賓同舉宏治乙卯應天鄉試己未成進士授工部主事分治三沽河牘多所興革三年改刑部員外郎執法不阿有千戶張福訟而抗法愬之逆瑾遂下貫詔獄邀重賄將復之貫不應謫知遼州己遷戶部郎陞浙江副使獎廉黜貪各得其情中監某在市舶

謬爲恭謹而貫故遠之遂絕請託之弊貫天性峭直居官奉職不少假借至論經術談詩文又鯁鯁忘分推誠也丙子考績京師道卒兄賓先成進士官江西參政弟贄以鄉薦爲崇安令

劉 乾字克柔宏治己未進士授戶部主事遷郎中五督糧餉累疏言邊事切中利害其督餉薊州逆瑾嫉其亢直使人縱火燒屯糧馬草坐罪逮繫事幸得白改兵部武選司釐正選格請託不行厯官光祿寺卿陳言二事其一以句稽往牒立條例慎出納其一以本寺煮醪費繁請移北寺爲便詔從之歲省費十倍因災異自陳致

江陰縣志

卷夫

人物

鄉賢

十四

仕卒賜祭葬

薛章憲字堯卿少爲諸生退學鄧暘之溪上洽聞博物傑然稱古作者吳人都穆讀其文擬之商彝夏鼎性喜佳山水意之所之輒輕千里赴焉居恆斂肱默坐古貌瞿瞿有鴻泥堂集晚號浮休居士

徐 度字克宏戊辰進士初任信陽知州累遷廣東按察司副使自少居貧力學晚歲登仕厯有政績

曹 宏字毅之父忠以進士起家少聰慧弱冠爲縣諸生文譽日起正德丙子舉應天明年舉南宮庚辰調知南豐縣南豐負山多盜宏至遂不能爲民害爲政務先禮

樂表曾子固之廬爲後學勸擢山東道御史抗疏劾權
貴不避奉命按四川軍伍適獠人犯關設策勦平之事
聞賜白金文綺以母老請侍養歸甫二年當事思其賢
方復召而卒年五十平生寡言笑於人落落詩歌古文
詞逼古作者云

蔣舜民字虞中正德丁丑進士初任新豐多惠政均田賦
蘇甲里修馬政撫逃民除驛弊而均田之制使民得安
生流亡歸業迄今賴之以不徇勢宦囑託曲爲下石先
是御史王濬母弟殺人舜民依律成獄濬遂奏其均地
變亂成法下撫按公勘俱白其功猶僅從常調轉眞定

江陰縣志

卷六

人物

鄉賢

五

同知督撫委以邊防遂上事宜七十餘條兼以五臺木
稅屬之文官遂除宦官剋剝之害太宰王瓊知其廉能
擢浙江僉事復以執法出罪忤上官論調浙紳在朝者
力辨之調山西僉事督理屯政積弊一清舜民素嫻兵
畧見雁門形勢思倣木牛流馬車戰火攻之制事將成
以失迎上官致仕歸銓部推太僕卿不報卒年七十

吳崑字仁夫正德初由歲貢任撫州府學訓導持己莊
敬率家人以孝弟與其弟白首同居可以媿世之分荆
然荳者

張誼字惟正嘉靖初由歲貢任開州訓導陞台州學正

性好編纂建樓藏書晨夕坐臥其上搜討舊文嘗葺家
乘著宗儀二十條以訓族人又讀史得偶語爲編曰讀
史類聚三十卷雖里塾稚蒙皆可誦習

吳 鳳順化鄉人年五十歲未嘗讀書居常賣錫爲業晨
出見市餅者出一大錢買之納諸懷中急持而歸人問
其故曰吾以遺吾母也如是者歲以爲常又常賣骨簪
雜物於市一惡少虐取之鳳不較或嗤其懦鳳曰設吾
與較恐詈及父母也母亡白楸之棺殮以時服又皆貸
于人早夜傭作以償旣葬母夙興拜墓下具盥盆進餅
食如生以母生前不類面不食也伐樹枝爲居棲號墓

江陰縣志

卷六

人物 鄉賢

三

側歷十二寒暑國人言于有司核實詔旌爲孝子

劉 羽字鳳來別號東岡繼武子也繼武中成化丁酉解
元戊戌成進士未幾卒羽時尙幼摧裂如成人母撫之
慟勸曰且休矣無自毀以墮前烈乃下帷攻苦漏盡輒
淚潛潛下正德庚午登鄉薦試進士不第後縱遊齊魯
聞素與樂陵令許公達友善訪之畱數月寇適至爲許
公畫守禦策公如其言賊駭遁許公晉按察備兵武定
將上其事曰因人之力以享名吾不爲也辭以母在此
身未敢許人許公強畱之一日忽心動適母病書至卽
不辭徑去由是家居養志未嘗一刻離無何母卒廬於

墓側泣血三年未嘗見齒有高子羔之風

張 袞字補之正德辛巳進士改翰林院庶吉士累遷侍讀學士掌南院以太常卿掌國子監祭酒降南京光祿卿致仕在翰林十四年值世廟右文明大倫正大祀皆與議先是議禮諸臣逮繫侍郎何孟春等抗疏忤旨無敢申救袞獨上疏請釋復奏罷陝西織造止雲南採取撤浙江內監性孝友先業悉讓兩弟爲文謹嚴嘗修江陰縣志著有水南集

薛 甲字應登章憲子嘉靖己丑進士禮部主事擢兵科給事中時方士邵元節用事夏言與之表裏甲四疏指

江陰縣志

卷六

人物 鄉賢

七

切時事而排斥異端尤切言惡之熾黨論謫湖廣布政司照磨後擢四川淑盧兵備僉事江西分巡南贛副使在淑盧解蒙撤數世之讐靖永播方萌之難在南贛誅葉廷春之負固招羊角水之堡城而贛故王守仁開府地衷其法行之勛績最著以忤嚴嵩歸會倭警甲倡議城楊舍堡邑令錢錞死難甲從亡卒中認其屍哭而殮之隨移書按撫得贈卹其學宗紫陽而參伍象山陽明嘗謂敬吾未能姑以畏階之因自署其室曰畏齋著有四書口義心學淵源錄心傳書院講義易象大旨薛子緒言藝文類稿諸書

劉光濟字憲謙嘉靖甲辰進士授戶部主事轉員外郎中
出守衛輝內艱補濟南擢山東憲副外艱補浙江轉江
西參政遷太僕寺卿晉都察院右副都御史巡撫江西
所至各有聲績在戶部時奉命權臨清剔蠹孔幾盡值
庚戌之變大同勤王師首至廷議遣郎一人餉之勢不
可前諸曹郎面皆土色光濟毅然請行竟達命雲中軍
士權聲如雷比歸家人驚喜出望外在南贛時大旱民
有種藍者二千餘人壅上流以溉下流之農亦聚千人
往爭不勝撫臣諭之不聽遽上章告變詔討平之發兵
有日矣光濟惻然曰民爭水利耳何至拒命請往諭之

江陰縣志

卷六

人物 鄉賢

三

其人初猶露刃自衛見光濟輕行乃來謁光濟具悉其
禍福其人咸搏頰自悔羅拜馬前曰惟公生我光濟以
其二魁還謁臺杖之數十眾遂安嘉靖末民苦賦役光
濟撫江西定賦役奏聞通行天下事載會典中至今遵
行之召爲南京戶部侍郎明年改吏部再晉南京吏部
尙書轉兵部參贊機務時江陵奪情議起僉都王篆欲
光濟首倡合疏光濟堅執不肯列名曰天子畱相國以
情我曹當持之以禮江陵聞而銜之遂劾御史曾士楚
論歸累薦不起萬厯甲申卒於家廕嗣構難失職卹典
不舉生平著述多散軼不傳

趙與治字道隆嘉靖癸丑進士初師事胡正蒙胡欲爲謀館選謝不就授曹州知州俸入外不私半鏹會大計嚴嵩當國筐篚填溢與治但循例投刺大忤嵩子遂調四川廣安事上官亢直不阿發巨室俞某奸狀俞募善水者斷其舟維于瞿塘幾覆與治白當道置之理御史行部奸胥輒句訪羅織與治廉得主名榜階下眾皆懼伏遷襄陽府同知南戶部員外郎轉武選聞母病歸屢薦不起家徒壁立布衣蔬食往來城郭一平頭奴隨之見者不知爲品官也年八十八卒無子產薄不能具喪葬兵使蔡獻臣經紀之

江陰縣志

卷六

人物 鄉賢

无

季 科字與登五世祖有開官給事科年少高才得其祖名文昌者所傳心解制藝力追先輩中嘉靖壬子鄉試癸丑成進士授官行人司奉使稱職擢爲禮科給事中歷吏兵工有清舉錯劾陸尉興河渠諸疏乙丑大計以資望推秉筆卻餽懲貪公論允愜補江西布政使右參政多所釐剔隆慶丁卯以養母謁告歸時年三十有六於舍後築清機園日修色養謝絕塵事母年九十終猶篤孺慕所著有華陽會語寄寄堂稟閒居雪浪鷗盟諸集

張汝翼字雲程廩生七歲從師授書至父母之年不可不

知輒流涕被面師問之曰吾父年五十一母年五十矣父嗜酒預以脩金付酒家聽其飲母隕于羹終身不啜羹歲饑養姊及甥于家妻子分糠覈食遇人無賢不肖一飲以和雖處橫逆不校也至老講學不輟時言學者宗良知汝翼弗善嘗言操戈紫陽以投時好卽取捷徑吾不願也每對人輒談古行誼人有踰檢必反覆勸諭令其愧悔而後已一日忽自笑或問故曰覺生平殊無可恨耳其自信如此

趙用賢字汝師參議承謙子先世爲宋宗室有士鵬者守江陰軍因家焉後徙常熟用賢少有才名登隆慶辛未

江陰縣志

卷六

人物 鄉賢

三

進士選庶吉士第一授檢討萬厯丁丑江陵相不奔喪臺省保留用賢抗疏請聽終制拜杖闕下爲編氓癸未召復原官晉中允時遷人輻集欲反江陵政而江陵舊人猶布滿九列因倡黨人之議用賢疏極言黨禍與吳編修俱乞歸不允後晉洗馬祭酒厯官吏部侍郎與選郎顧憲成辨論人材以進賢退不肖爲己任竟用讒歸先是拜杖日刲敗肉如掌陳夫人腊而藏之每見其嚼齒擊案輒奉櫝進曰盍爲餘腊地乎雖爲之斂容歎息終不能改也其爲文章博達詳贍尤長于奏疏尺牘有文集行于世贈太子太保禮部尙書諡文毅

袁一驥字德良萬厯癸未進士厯儀曹請建儲請日講請復建文年號得旨改正後聞父病乞歸起補湖廣按察使會有楚藩之變與讞事特從寬議父歿服除巡撫福建時稅璫高案橫恣一驥先有疏禁販罷稅復答其黨璫啣之一日商民以璫取肆物不貲羣起赴愬璫乘國喪撤衛擁眾入署劫一驥會官兵環集璫遁疏聞五上得報責案激變撤回閩人歡呼動地一驥卽六疏乞歸得旨褒以撫閩有功立專祠祀之

夏樹芳字茂卿先世素封至其父以役廢產樹芳少食貧教授里中萬厯乙酉舉於鄉念母老不欲少離三上公車後不赴隱居毘山東麓數十年當道並薦於朝請如陳獻章吳與弼故事樹芳若不聞也年八十卒所著有消暘集詞林海錯女鏡奇姓通譜諸書

顧言字尙實萬厯壬辰進士初令慈溪捐俸遷縣治興文學抗節抑礦璫片言定軍變立徵解良法以除民累開杜白二湖以興民利因強項不阿僅轉南曹由刑部郎出守南昌忤時相左遷汝州歲大旱徒步雪禱謂民命重於官守不候旨發帑金全活萬計又復書院通水利擒盜魁治巫媪旣以戶部郎督餉延緩丁艱起復以職方郎爲浙江按察使司副使旋有四川參政之命卒

於金華道中慈汝士民間而哭於生祠各請祀之名宦
繆昌期字當時少善屬文以名節自砥萬曆癸丑進士選
庶吉士與楊漣左光斗善梃擊事起昌期語人曰一御
史以風癩二字出脫亂臣賊子一御史以奇貨元功四
字抹殺忠臣義士蓋指劉廷元劉光復也廷元因喉劉
文炳劾之甫授檢討卽移疾歸天啟辛酉補官典試湖
廣論以周公愛君爲題程文有仇士良趙高等語大觸
魏璫忌時璫勢驕恣昌期語座主葉向高謂公三朝老
臣當以去就爭之無使中人手滑向高迂其言領之而
已晉贊善諭德璫營生壙於玉泉山令其客以碑文請

江陰縣志

卷六

人物 鄉賢

三

昌期正色曰生平恥諛墓況肯爲刑餘辱吾筆邪璫銜
之刺骨楊漣二十四罪之疏入僉謂出昌期手名賢次
第斥逐昌期必灑涕言別明知爲訶者所見勿避也中
旨勒令閑住丙寅春與周宗建同逮中途作自序千言
及下詔獄楚毒備至橐篋中傳片紙出自是遂絕斂時
十指墮落諸子捧掬納袖中聞者無不悲痛昌期天性
純孝父末疾臥蓐十七年每中夜聞警咳必整衣起立
牀下接引後學娓娓不倦非其類者嘗目攝之出語皆
具救世苦心因持局過峻遂罹黨禍崇禎初贈詹事府
詹事兼翰林院侍讀學士謚文貞著有從野堂集

李應昇字仲達萬曆丙辰進士授南康府推官至卽決積案六百餘出冤民江九五等一十九人民歌之曰前林後李清和無比林謂閩中林學會也擢福建道御史首陳保身及內操以清政源再陳吏治民隱以固邦本其大快公論者劾魏廣微魏忠賢崔呈秀及救萬燦四疏呈秀被黜奧援復起嗾黨誣論削籍歸與高攀龍周順昌同被逮時緹騎旁午應昇慮人情憤激聞命卽先入郡與親知訣及開讀郡士民環集爭欲甘心緹尉應昇搏頰丐免或有勸效高攀龍者答曰應昇如草草畢命陷吾親縲絏中死不瞑目今歸死詔獄吾分也既赴獄

江陰縣志

卷六

人物 鄉賢

三

五毒備至坐贓四千嚴比同年及門人爲代輸卒不免將死作詩與其兄應昇訣別時年三十有四應昇事父母孝事兄悌傷季弟早歿獄中猶爲作壙記崇禎初贈太僕寺卿諡忠毅著有落落齋集

貢修齡字國祺初名萬程安甫四世孫萬曆己未進士知東陽縣革耗羨蠲贖緩撫流亡杜干請攝義烏事治行一如東陽三薦卓異士民畏壘祀焉內召己注吏部奄黨齟之補刑曹引經斷獄稱明允晉少參董浙漕革陋規至盡再副閩臬以介直不容投劾歸復起江西少參分守湖東單車就道與江撫某不合解組歸著有匡山

斗酒堂諸集

戚 勳字羽明諸生以例入南雍授中書舍人乞假歸國
變福王建號授前官奉命督閩餉將行奏請設官防江
情詞懇摯比反福王已被執遂自青陽移家入城在圍
中堅守八十一日城破積薪繞屋焚香具朝服北面拜
呼烈皇帝大書於壁曰大明文華殿中書戚勳死節之
地先命三妾二女一婢投繯遂縱火自焚死一門死者
二十一人著有畱丹集佩朱隨筆

國朝乾隆四十一年

賜諡烈愍

江陰縣志

卷七

人物 鄉賢

七

國朝徐之龍字仲升恩貢生授神木縣知縣撫以恩信逆賊
王永疆高有才倡亂攻城之龍擐甲執戈嬰城固守其
二子廷綸寵綸亦踴躍襄事久之力不支城陷之龍父
子皆被執不屈賊猶縻之未卽加害
大兵進勦賊知不免遂刃之龍父子家屬十一人皆被害事
聞贈山西按察司僉事予祭葬蔭一子嘉慶間

賞恩騎尉世襲

季 芷

戚 藩字价人勳弟順治乙未進士知安定縣縣本山瘠
又值旱蝗藩多方撫卹流徙復業捐公費節驛役以抵

民逋賦其催科不假胥役但以官符付里正賦咸辦暇則課諸生肄業人文爲之一變尋以事去不名一錢爲人經介專靜不事浮競制藝與熊劉齊名康熙間寓十方菴無疾卒祀安定名宦祠

朱 衣字子吉恬澹無他嗜好閉戶窮經尤喜談詩與程如嬰周捷同輯明詩歸若干卷家屢空衣處之怡然嘗於除夕獨登君山坐臥大石上賦詩自樂其意致如此著有卷齋詩稿藏於家

章耿光字子覲號腹庵明太祖賜儒籍章庠之裔孫也資性醇謹鼎革時奉父避兵草棘間瀕於危而得脫弟某

江陰縣志

卷六

人物

鄉賢

三

守城死難每念及輒涕流康熙丙午舉於鄉辛亥任徽州府教授訓諸生敦本立品修黌宮置學田創建社學教化一新攝敎縣學篆值山寇竊發或勸少避耿光守庠序弗去及歸郡人設主以祀焉家世曲臺禮因患陳澔集注多舛誤更著禮記纂注頗詳密學者宗之其孫玉樹復以禮經雋壬午教授上元縣學曾孫士鳳中己

酉

徐世沐字爾瀚邑諸生沈潛好學自成童迄耄耄未嘗一日釋卷所著有學庸論孟易詩書禮春秋孝經小學講義統名曰惜陰錄別爲心性圖二卷性學吟四卷分晰

異同多先儒所未備窮年鍵戶纂述外人罕見其面當道式閩學使惺齋李公尤推重之生一子恪博雅能詩文選拔入成均歷任棗強羅溪令以勞卒於官孫崑補邑弟子員家居聞訃赴粵扶父柩亦卒於粵士論惜焉

耿 勳號節庵康熙戊午副車品行端潔不屑屑爲詞章之學家甚貧而清操愈厲知交多貴顯者累招不就楊文定公夙推尊之及旣貴勳亢前輩禮自若以教習謁選卒於都門士林咸痛惜焉子人龍字書升廩貢生淳古敦樸恂恂若不出口及叩其中於先儒宗旨貫串融釋淵如也會督學胡公問士於文定以人龍對遂延閱

江陰縣志

卷七

人物 鄉賢

美

卷初胡與文定爲辛未同譜俱出安溪相國門安溪素談成宏法故胡以此取士而外論或議其失真及人龍入頗有所裁正後陳檢討視學粵東復邀與偕往旣歸以沈約韻書傳久多龐雜乃手著韻通三十餘卷於音切辨析毫芒又著易解蓋得諸梅正平之後云

許 觀字上公故明諸生甲申後更字尙公父松宜邑高材生亡時觀甫七齡悍族涎其資齟齬之繼室戴氏挈觀依母家弱冠蒙母姓游郡庠刻意力學博涉經史革運時奉母避兵赤岸里交李膚公遜之始謝舉子業肆意于詩古文著有善養集多紀述甲乙間事知言者以

爲有少陵詩史風母亡不能營葬地寢臥柩旁者數載
弟國少觀四歲親爲授書偕隱東城隅飲食遊處必偕
國先卒家事一以身任之尤好爲利濟事嘗捐資濬秦
涇支河里餘晚歲習青囊術貧乏者邀之視疾昏暮風
雪輒應酬以鏹揮去之其耿介如此子大定字禹清少
負奇氣擅幹濟才以補武庠鬱鬱不得志遂從辟書佐
幕遨遊齊秦魯衛淮泗間熟諳黃淮形勢瞭如指掌遂
畱河工宣力相度阻隘扼塞險要事半功倍靡不底績
積數載考績稱最授兗州府運河同知管濟甯河道甫
抵任前官方虧帑金數萬爲代任卒坐是貽累在任築
城濬河除回匪析冤獄民稱神君旋擢河北鹽驛道歷
署藩臬道府縣篆敷歷二十餘年所至以幹練敏達聞
於時其行誼則酷肖其父云

朱廷鏞字玉汝中康熙己酉鄉舉謁選上元縣教諭壬戌
成進士授涪化令值歲大饑秦民流亡過半當道檄許
貧民貸粟富室廷鏞慮生變請止之亟出倉穀千百石
賑濟會得

旨發賑得免舉劾以才能兼攝武功同官鄠縣三邑篆各著政聲
督撫薦揆內擢御史風節清剛疏請官員以卓異行取
者不入常例銓次又請充發烏喇人犯免其就五城柳

責不致負創道斃一條著爲定例又長至郊祀有大司農等七人未與齋宿廷鋹飛章彈劾祀典整肅歷陞奉天府丞大理少卿皆恪謹盡職以老致仕卒於家生平長於詩所著有南樓江花等集其子冲歲貢亦以能詩世其家學焉

楊名時字賓實爲諸生日卽究心性命之學康熙辛未進士改庶吉士舉主李文貞深重之從受學詣益精邃授檢討提督順天學政教諸生以居敬窮理爲宗擢侍講入直

南書房授直隸巡道時直隸未設按察使巡道專理刑獄名

江陰縣志

卷六

人物 鄉賢

三

時廉斷稱最累遷貴州布政使雲南巡撫值西藏用兵屯滇以待進止名時捐廉建屋百數處之饋餉皆計里給值民輸兵糧者請折銀徵解又舊有公件子孫丁銀等項輸納反倍於正額悉爲均役減派擢雲貴總督以洱海尾流爲沙石壅數爲患奏請疏洩費皆官出凡利民事以次舉行坐事落職聽勘承訊官多所拮據禍幾不測賴

世宗知之深得罪居行館七年未嘗一日廢學凡古昔聖哲相傳性命道數之旨益深思而力討之

高宗御宇起禮部尙書管國子監事仍值

南書房受事後日以講明理學造就人才爲務薦經術之士
莊亨陽秦蕙田等七人分掌教事請增順天江南陝西
解額黔中苗亂上綏定苗疆方畧皆見施行未幾疾作
授遺疏以治化方新

聖躬惟健行不息

聖德必日進無疆爲言語不及私比卒

上震悼降

旨稱名時學問醇正品行端方

贈太子太傅入祀賢良祠

諭賜祭葬

江陰縣志

卷六

人物 鄉賢

三

賜謚文定著有四書易經詩經劄記採入

四庫全書文集若干卷

繆宏仁字膚敏爲文貞公昌期之曾孫祖純白父疇咸宏
仁幼卽端重長爲制藝鎔今鑄古不涉時趨補弟子員
第一餼於庠屢試棘闈不利杜門課子潛心理學諸書
著有自約言隨筆家訓皆由淺入深以小喻大修己教
人之法莫切於是生平敦孝友不言而躬行鄉里稱爲
長者子誥字繩孫以甲科歷任宜章新鄭令所至清介
著聲爲能世其家學云

陳 燦字粲生邑庠生有至性年二十一母卒號泣廬墓

側者百日以父命勉入塾有閒輒省墓徬徨不忍去及父歿破產營葬事事繼母庶母皆盡禮鄉里式之雖好周恤不計有無鄰有周姓者以家貧生女將溺之燦聞之急往救不時資助其家故其終身視燦如父子均字秉侯號一泓讀書嗜古文筆清華秀麗具臺閣氣象受知學使吉水李公試輒高等初燦家本儒素以慷慨好施家計益窶均出就館所得脯脩皆以遺親分毫無所私依袁了凡行功過格常著省身八箴於座右舉康熙丙子鄉試第二人登丙戌進士官庶常己丑充同考官甄拔多名士丁酉

江陰縣志

卷六

人物 鄉賢

早

廷試稱

旨遂奉督學廣東之命事竣還朝卒於京師

夏敦仁字調元需之長子需故邑所稱夏孝子若時也敦仁以五經世其家渾厚樸茂制義言有本原滾滾不竭自稱識字布衣著愛日編等書數種後進咸慕之尤存心利濟始需以斜涇河民田資灌溉濬之後復就淤敦仁大捐貲以濬身董其役至今父老耕畔者猶稱述夏氏之德弟敦義幼號神童見沙際燾傳次敦禮國學生績行讀書倡捐修學次文彬廩貢生至性純篤居喪哀毀盡禮行文自成一家人謂敦禮如兄之好施文彬似

兄之好學

貢

震

見政績

道光二十一年奉文入祠

崇祀忠義傳

前宋徐

耕富而尚義元嘉末邑大饑以米千斛助官賑

貸議者以方漢卜式詔褒之授縣令秩不受

宋耿

秉

見鄉賢

元李士龍

見鄉賢

蔡廷秀字君美宋西山裔父以忠創建澄江書院廷秀博

學多聞器識沈毅為袁州推官時蘄寇陷袁州廷秀被

執三日罵不絕口遂遇害初左丞烏古孫良禎薦廷秀

江陰縣志

卷六

人物

忠義

聖

江西省檢校命下已死

許 晉字德昭有武畧子如璋亦英毅至正壬辰紅巾賊

起晉潛集勇士資以衣糧保護鄉井陰約官軍與賊戰

已為內應官軍戰不利晉帥所募酣鬪於城北祥符寺

前會賊黨自他所來犄其後如璋與家僮往援手刃數

人破圍入父子俱戰歿官軍求其屍還葬父老皆墮淚

曰父死忠子死孝名其里為忠孝里

吳 重字士宏饒於資張士誠踞土僭號其偽左丞朱定

索糧於重重以士誠僭逆詈弗與定遂圍焚重居殲其

家惟八歲孤遠獲免詳史自守三義記

明許 節字文度恕子詩文皆得父傳洪武中以文學舉
起家江山縣主簿擢禮部主事有能名時周王母薨而
馬后猶在上命百官成服節據禮抗疏爭之不納翼日
百官喻旨易服入節獨緋衣進見上震怒謫戍五開尉
以死論者謂主事卑官耳能昂首奮氣爭辨於盈廷唯
諾之時可謂不負禮官者矣著有述古齋集

陳 清字心水明初授江陰副千戶以功封合浦侯謚忠
武

朱安七字德剛洪武末以才德薦爲秦府紀善建文時靖
難師起與茅大芳鐵鉉同誓師遏之成祖卽位戮諸不

江陰縣志

卷七

人物 忠義

三

用命者縲絏以死

徐 麒字本中洪武癸酉奉勅持節諭蜀事竣還應授顯
秩以終養辭子忞字景南忞字景州應詔輸粟正統間
旌爲義民景泰間賜冠帶欲追旌麒又進鞍馬得表墓
旌義

周伯源傾財好施爲德於鄉正統間其孫珪字孟敬出粟
賑荒貢馬助邊祖孫俱旌爲義民詔碑伯源之墓

陳 瑩字榮甫子安字孟寬正統中安出粟二千石賑飢
詔旌義民又輸芻橐六千束助邊乞加恩於父詔碑義
民於瑩之墓凡義塾義冢成梁螿道皆捐資不懈舉謨

其後也

夏 蒙字孟承景泰間貢鞍馬芻秣以助軍興詔給冠服
辭不拜請旌其祖允墓從之成化間復出粟二千石助

賑飢

顧

琳

見鄉賢

湯

沐

見鄉賢

貢安甫

見鄉賢

史良佐

見鄉賢

黃

昭

見鄉賢

黃正色字士尙其先於元末爲江陰教諭遂家焉嘉靖己

江陰縣志

卷七

人物

忠義

三

丑成進士令仁和香山南海所至稱神明南海霍文敏
爲正色座師霍氏有犯一繩以法文敏以爲賢擢御史
首論兵部尙書張瓚武定侯郭勳士論躉之荆山侯崔
元巨璫鮑忠護章聖皇太后梓宮還葬承天怙寵黷貨
正色疏列其不法狀忠等轉誣正色於梓宮前乘馬張
扇上怒杖之闕下賴文敏力救得戍遼居戍所三十年
遼左人士從之遊成就甚眾隆慶中復原官進南京太
僕寺卿致仕歸卒祀遼陽三忠祠又祀府先賢祠

陳皋謨字思贊嘉靖甲辰進士除知蒲州蒲當關洛要衝
最繁劇宗室列邸其閒豪猾難馭皋謨潔已持法以身

爲範不煩搏擊而俗自化三年被徵士民立祠祀之擢
刑部員外郎遷南京營繕郎中廉介如治蒲弊源俱絕
會倭寇起海上檄理城守員暑焦勞卒於官旣卒而有
廣西僉事之命當在蒲時識拔張四維於諸生中爲完
室授館著有薄遊北遊南都諸稿

黃 瀾字原之庠生屢舉弗售以孝弟力田爲務生平多
善舉設義學鑿義井置義莊姻黨有急屢告無厭色凡
羈旅阻厄者咸計程廩授之正德間歲饑發粟千斛有
奇給散鄉人置五竈爲糜食餓夫所活千計死者棺斂
之事聞旌其門

江陰縣志

卷七

人物

忠義

四

黃 鑾字世鳴諸生倜儻多奇計嘉靖間捐金六千兩築
城東南面三百餘丈以備倭警歲丙辰倭益猖獗復輸
銀二千兩增子城三座倭環攻三十三日不破民賴以
全圍城時輸粟七千石以給士兵再輸粟三千石以安
客兵給貧民之無食者後趙文華索軍餉縣無以應又
助軍興銀七千兩邑人爲立專祠

王 遠字旣明負至性擅才畧通天文地理風角諸書親
歿廬墓三年嘉靖中倭警長吏推擇統鄉勇爲障禦倭
由百丈登陸薄江上鄉民奔竄死傷枕藉遠集眾保障
全活無算官給牢醴糶盡散士卒歸有光爲立傳

吳 兌字前林青暘團長魁岸有膂力嘗之京遇盜發嚙矢附耳過兌發矢亦如之盜驚下馬問客何人曰我江陰吳兌也盜謝罪去嘉靖乙卯倭再犯江陰兌從錢鎬率千人禦之斫陣摧其鋒寇稍引退又自無錫來掠青暘鎬命禦倭於石幢策馬統鄉兵百人往馬畏木梁不肯渡兌挾馬而過至鄭莊港突遇倭鄉兵驚散兌獨與鬪倭皆怯將泗水去水深不可過登岸復戰會鎬被矢傷倭雜至兌當其衝失足墮水被數刃佯死倭乃去昇還一日卒鎬爲文祭之萬厯中知縣劉守泰請置特祠詔從之今青暘市南義勇祠是也

江陰縣志

卷六

人物

忠義

望

楊 成字國用錢鎬募爲親兵嘗以兒呼之鎬憤倭殘掠集義勇數十人親訓練每出陣撫成背曰吾不忍百姓遭此屠戮願以死救民兒務努力成奉命感奮一軍踴躍乙卯倭大至成隨鎬出南郊躍馬衝鋒奮呼接戰於九里灣地險馬仆成急下馬掖鎬乘之伏兵起草間前鋒狼兵驚潰成與陳裕邢惠郭斌及鎮江義勇金鳴等十人怒呼格鬪以身翼鎬無不一以當百力竭賊蟻集截鎬墮馬成抱鎬攫鋒刃瞑目罵賊體糜如醢鎬遂遇害裕惠斌悉死之事聞從祀錢侯祠廡

趙用賢

見鄉賢

繆昌期見鄉賢

李應昇見鄉賢

陳震亨字百里天啟乙丑武科進士崇禎間流氛逼泗陵奉詔以都指揮調守七月寇大集盱眙按臣梁雲構徵師勦禦震亨慨然曰朝廷重陵寢無盱眙則無陵寢矣臣子致命在此時也時寇勢方張震亨所率浙兵僅五百殺賊無算殲其賊首賊遂大譟合圍追擊自辰至酉飢且渴外援莫至矢盡兵絕為賊射落兜鍪乃裂帛纏首戰益力格殺數十人被執罵賊至斷舌詈聲不絕死時僵立不仆怒目裂出事聞詔贈昭勇將軍建祠死所

江陰縣志

卷六

人物 忠義

吳

蔭一子

國朝乾隆四十一年

賜諡烈愍

戚

勳見鄉賢

李 耿字道廉大興籍崇禎庚辰進士官壽光知縣

大兵下壽光自經城上死

賜諡節愍

朱養時魯藩監國於紹興授兵部郎中一作河南紹興師

潰魯藩退保舟山舟山破抗節死

賜諡節愍

潘文先丹徒人

職官表照沈志
作文起蔡志漏

江陰訓導罷官後城破與

訓導馮厚敦同死

許 用字孝孺學夷孫國棟子垂髻冠邑庠讀書通大義
每自勗曰讀聖賢書當學聖賢事乙酉南都不守會同
學哭於明倫堂方亨莅縣任諭士民薙髮眾不願亨厲
聲危語怵之用曰頭可斷髮不可斷也眾噪而出遂定
守城之計居圍中與閻應元陳明遇商榷機務中秋月
夕效楚歌作五更轉曲教守陴者按拍倚歌聞者泣下
及城破於所居後樓跪抱母李氏膝舉火自焚死時年
三十有六從死者妻某氏弟某女弟二人婢僕十一人

江陰縣志

卷六

人物 忠義

七

舉家十七口其伯父國泰亦諸生妻亦李氏次子謙亨
字受豫長媳林氏甥女二人俱同焚死惟謙亨之兄萃
亨得免於難有賃用門屋居者將舉火遣之去其人曰
主人自焚客將焉往亦俱死

夏維新字燦焉崇禎癸酉舉人城破日死

王 華庠生城破日死

呂九韶武進庠生在江陰會城破自刎死

黃毓祺字介子鑾曾孫恩貢生慷慨負奇氣於學無所不
窺與弟毓初並知名見明政日衰憂時感事多發爲詩
歌周延儒未第時僑寓其家一日與談毓祺舉案上硯

擲之不中歎曰恨不殺此誤國兒乙酉之變江陰城圍
毓祺與門人徐趨客鄧大林等舉兵行塘以應城內城
破毓祺念四方未靖擬圖後舉乃逸去明年歸里見其
親屍出於棺營葬畢悲懣抑鬱僉人謀以前事羅織之
兼徐趨事敗復逸去子大湛大洪被收兄弟方爭死而
毓祺以敕印事發捕至所司詰曰若欲何爲曰求一死
耳下金陵獄吟詠不少輟將刑或以期告取襲衣自斂
跌坐而逝仍戮其屍時年六十有一著有古杏堂集大
愚老人集毓祺在獄時從子大澳後更名覺納橐餽或勸之
避不去毓祺旣死獨大湛入旗爲奴湛妻周氏當行自

江陰縣志

卷六

人物 忠義

哭

勿於郡庭不死卒投繯死湛旣行僧紹元傾貲贖以歸
徐 趨字佩玉庠生行塘事敗逸去後偵知江陰無備率
壯士十四人襲之不克死 自陳震亨以下皆乾隆四
十一年入祠

邵康公歙縣人壯勇善刀槊與程璧俱僑寓江陰乙酉守
城璧薦康公有武畧眾推爲將遇戰深入陷陣矢石無
所避城破巷戰死

金允鏜字君若父熊字敬軒有善行允鏜行如其父兩世
皆舉鄉飲賓受八品冠帶乙酉之變允鏜與妻黃氏同
殉難

方有聲字克駿諸生試輒冠軍遇生徒之貧者不受脩脯
邑令吳鼎泰器重之圍城中死難

周高起字伯高博聞強識工古文辭早歲餽於庠與徐遵
湯同修縣志居由里山遊兵突至被執索貲怒詈不屈
死著有讀書志

王清芳字遠之庠生研心易理在圍中無戚容日焚香讀
易城破援筆題詩曰壯志已隨燈焰滅丹心期與水長
流令婦徐氏先死隨正衣冠自經

顧大本字南字爲人樸直少戇年八十餘城破兵以其老
也繫之不卽殺大本呼天指日誓以身殉乃殺之

江陰縣志

卷六

人物 忠義

吳

曹 燧字開禧年十六遊庠江濱盜起鄉民恐竄燧出貲
練鄉兵謹偵禦境獲安乙酉兵至倉墩迎戰眾潰燧慨
然獨前曰此吾授命之日也揮刀陷陣死年二十九
王錫黼字秀之庠生有勇力任俠好義城圍黼與妻妾訣
曰吾死若其奈何俱泣曰君報國吾等誓相從於地下
黼搜城捍禦多所殺傷城破穿脅懸諸梁以絕妻妾皆
赴火死

戚 京世襲太倉衛指揮調兵備道中軍守備變作兵使
馬鳴寔逸去京母章氏勉京死守京死之母自經
陸瞻岑城破自焚死僕季自明從死

高明德字中和子啟隆字子升監生城圍明德命妻媳避
兵於邑東啟隆出城探母居十餘日啟隆妻謂之曰父
捍危城子豈得久離乎啟隆縋入城父子偕死

趙應選字少泉被執不屈死孫天潤壬戌進士

劉因可字叔宗遇兵不屈斷其頭身植立不仆合營驚異
黃楷字端伯諸生管燕翼及弟某沈璘沈羽搏王鳴弟
子某高觀王景陳景雲唐馱姚某十一人皆殉難或歌
之曰從容就義黃端伯儒服賓賓好自刎壁上畱詩管
燕翼兄弟雙雙居城北沈璘膽氣粗如斗銅礮發來擊
左手獨奮沙場沈羽搏拖腸猶戰勇桓桓王鳴弟子鏃

江陰縣志

卷七

人物 忠義

辛

穿腦翻身射人然後倒高觀敗衄成纍俘寸磔不降甘
鑽鉄東門鎖鑰歸王景終焉身殉銅魚影蠟炬輸忠陳
景雲膏明徹夜還自焚帶箭唐馱過九九奪刀還斷驍
雄手姚家有子顏如玉血濺瓊華委溝瀆

蔡志端伯訛
作瑞伯致詳

題時以黃楷黃
瑞伯爲二人

尹全章重光字璧陳蔣文經陳式玉字尊度王泰王謝何
石奇高一鯤馮延周陸鴻圖陳定育史纘勳皆諸生殉
難死林鳳儀史補袞亦諸生令妻女子媳先死後冠服
赴井死

沈應乾蕭憶江高旭陸慎所高應麟王肅衷薛啟芳季惟

明錢求王秀徐彬邢漢字友石陳憲忠顧瑜齊程皆老
民殉難死

董臣虞字去華子大有字希友皆諸生同死章明敘諸生
與子獻同死李問政字涵醕與子芳諸生同死王從讓
字遜甫與子之經同死

臣虞去華前志兩見
以致詳題亦作二人

徐松齡杞齡徐五柱六柱王應科應甲章懋賢字爾希諸
生懋學字爾敏懋才字爾嘉吳幼學幼志幼蜚皆諸生
張士偉士僕均兄弟同死周振伯白石山戰死弟懷亮
城破巷戰死季世美虞門戰死弟從孝城破巷戰死

高日增與妻同殉難死何君碩胡正泰胡正升吳鼎隆耿

江陰縣志

卷六

人物 忠義

五

以誠史上表程斗望梅舒白皆殉難其妻皆守節撫孤
周克新殉難其女守節陸某花山人遊騎入其家同子
持戈與鬪眾併力殺之其妻揮斧捍禦中矢死女被掠
自刎

朱見亭方啟明合門焚死譙新諸生一門二十一口俱死
史達尊諸生父子叔姪俱死宦士元二弟四子俱死徐
步一門十五口赴井死薛耀明二十一口俱死張維祐
字有秩諸生被難死子誠姪邁諸生赴泮池死王允貞
字彥伯子命鼎姪命新啟新皆諸生守城死其族永貞
惟敬運泰元吉穆如永昌大政大諫大讓大成世茂選

錫福皆死

前志大成訛
大武選訛遜

宋

珣字采兮勸父士達出避城破日死王廷材字用之

與弟子固代兄之穎守城俱死蔡良臣遣弟良佐出避

一家十八口皆死程永清字舒白遣其妻挈子出避城

破死凌啟芳合門皆死子士英甫九齡或負以出張之

英守城死子俊民既絕而蘇陳龍泉本姓徐與弟玉泉

子士傑字仲靈合門三十八口同焚死惟士傑子永錫

方三歲藏米櫃中得免趙某諸生城破日與妻及三男

二女自焚有三歲遺孤老嫗抱匿空棺得免

蔡志誤以
龍泉玉泉

爲士傑子詳題後
其裔孫請更正

江陰縣志

卷六

人物

忠義

三

顧叔薦江陰營把總協力守城城破死湯瑞明分守西城

悉力捍禦城破接戰被創死王宗賢字尙之家清化鄉

率鄉人捍禦中流矢死周應元字天授應募守城圍急

殺傷數十人奪圍出西關被環弩死

徐亮工字虞欽崇禎癸酉舉人任吳堡縣知縣有惠政退

休後歿於變 自邵康公以下皆道光七年旌

國朝徐之龍

見鄉
賢

徐廷綸寵綸見徐之龍傳道光七年旌

鍾維嶽字魯峰康熙丙戌武科進士授侍衛累遷廣西新

泰營參將革除安南入貢開關茶果陋規造盜甲弓刀

四百餘具調補督標前營獲劇盜百餘擢廣東黃岡協副將值歲饑米價騰貴倡所屬捐俸買穀三千石建倉賑積貯借給貧兵米價以平會有忌者撫微事中傷之調直隸督標副將雍正六年噶爾策凌擾陝西

世宗以維嶽可用

召見命隸大將軍岳鍾琪麾下維嶽素以材勇見知於岳至則欲倚以立功遂令任固原城守參將督官兵進勦遇賊兵擊破之賊遁去會天寒雪甚士卒凍飢裂指墮膚幾無人色或勸之返維嶽歎曰用兵之道有進無退敢畏避邪進至巴里坤疾作曰已矣此吾畢命處矣歿於軍道

江陰縣志

卷七

人物 忠義

三

光七年旌

未祀忠義傳

明徐公輔字良卿六安人其祖從明祖渡江任蘇州府通判徙居江陰公輔以指揮同知任浙東右翼金斗尉右副都元帥龍鳳九年從征陳友諒彈中腦猶力戰被獲不屈死追封東海郡侯輕車都尉懷遠將軍入功臣廟歲祀康郎山弟弼字安卿龍鳳中從公輔下徽州婺源厯官山西按察使祀休甯名宦祠弼子遜字伯敏江西秦和縣知縣有政績

曹

淵字伯淵宋駙馬址裔孫氣勇過人元季盜賊蜂起

里中糾義社推淵爲首出米千石供軍食屢平劇盜明祖取江陰淵率父老迎謁賜御書榜爲義軍帥以禦張士誠軍功授統領兵民元帥守秦望山轄沿江諸堡洪武元年士誠平義兵歸農有劇賊流入觀山劫掠淵集兵纔滿百人卽馳與戰手殺數十人中流矢死詔贈浙江都指揮使司同知蔭一子錦衣衛千戶學士宋濂作詩輓之

許 蓉字子城豪爽有才畧知縣錢鎔因倭警委統民兵千餘固塞港口明年倭至接戰於楊舍之北倭焚舟遁去後鎔命探東路軍情倭焚其室歲戊午巡按尙維持

江陰縣志

卷六

人物

忠義

番

創築楊舍城率子六人董其役捐金助之維持欲薦諸朝力辭其僕陳周朱貴皆隨蓉禦倭力戰死

李 安嘉靖間倭亂倡義保聚力戰死時有陳選兄弟亦統眾禦倭倭伏發襲殺之知縣錢鎔並爲捐葬表墓

周 蘭嘉靖間海寇侯仲金劫人於江蘭應募駕大艦奮擊之夜半乘怒潮挺鎗躍上賊舟賊眾披靡殺二十餘人溺死者無算賊潰逸會援兵不集賊糾後勁逼戰蘭度不敵投江死經二十日屍浮進黃田港抵家後扉而止顏色如生尙堅握長鎗作鏖戰狀郡守義其事遣官致祭立專祠

陸 珍字席之順天武舉與李忠毅友善忠毅下詔獄珍奔走號救忠毅畢命珍偕忠毅兄應炅營斂崇禎初復偕請卹典當事重之

程 璧歙縣人監生寓江邑乙酉城守乏糧璧捐金三萬五千以助往徽州乞援於金聲江天一及返城已陷為僧於徐墅以老

崇祀孝弟傳

前宋吳欣之見鄉賢

宋陳思道見鄉賢

葛書思見鄉賢

江陰縣志

卷六

人物

孝弟

垂

耿軫耿角秉孫羽子並以孝聞理宗朝累奉徵辟以養親力辭上官均滿中行各贈以詩并顏其堂曰溫清

元李辰見鄉賢

章 齊字敬叔性至孝學成不仕父文死雷溝亂兵中求屍不得哀慟絕粒者七日書蓼莪首章遺子庠擲筆而逝

明趙鉉見鄉賢

吳 運八歲喪父祖父母老而瞽母邢苦節運每晨出販果餅以資贍養母夏日病思飲冰不可得運呼號告天忽雨冰奉母食之病愈母亡刻木肖像晨夕上食如常

部使者以母子節孝奏旌其門

俞 達性友愛其兄服賈遠方他賈犯權鹽禁連坐達閔
兄孱弱代遣於濠三載乃歸

劉 羽 見鄉賢

吳 鳳 見鄉賢

顧 金賈中州四十年一日挈百金歸散其族展祖父母
墓見侵葬過半攀木悲號訟遷侵冢立碑表識拜墓而
去

蘇伯宗字汝立家故貧九歲喪母父震得膈疾割股進之
愈

江陰縣志 卷六 人物 孝弟 美

繆應時字行甫少失怙以醫名於時孝事節母徐氏母病
膈應時焚香告天願減年延母算嘗母糞以驗疾憂勞
痛瘁不一月鬚鬢皆白母尋愈崇禎六年旌

顧 桂字明卿祖濟父續被誣殺人置獄桂年十二挺身
訟冤祖父俱得脫訟庭碑仆壓不死渡湖風惡溺不死
李忠毅為誌

陳 紱字廷章甫垂髫隨父歸自榮縣幕泊舟江岸父失
足墮水紱奮身投江捫救善泅者繼下見父子相抱水
底水深數十丈俱救之起

徐從益字謙甫九歲喪母號泣欲殉姊止之十二歲父邁

疾倭至家人悉走從益跪哭臥所不起倭斂刃去後殉
乙酉之難

殷 善字斗墟母疾號泣籲天願以身代獲痊後母卒廬
墓三載當事式廬給額

李光祖少喪父孝事母愛其弟終身未嘗異財

沈 楷字可端爲里塾師資脩脯以養母母卒廬墓哀號
三年邑令林守信旌之

方雲龍字遠飛父病日日漱舌舐之豁然復明母患崩漏
束衣藉草偕妻蔣氏臥榻下坐擁起扶者累歲蔣躬爲
浣濯每夕叩天請以身代母疾遂瘳

江陰縣志

卷六

人物 孝弟

七

周宗孝孝事其父夜有盜入室縛其父灼之宗孝持鐵銃
奮身入一擊銃折盜首分爲兩羣盜駭昇屍去父得不
死

王之誠少失母日擔水以養父雖堅冰冱寒不少息父好
佛兼好飲香燈旨酒之費欣然奉之每夕候父熟睡乃
寢朔望必禱於神願捐己壽以益親身衣百結衣而以
新衣奉其父或勸之娶曰增一食指父養必缺惟念嗣
續計拮据爲弟納婦云

范 智字仲才少孤育於范傭身以養嗣母母或不悅跪
而請杖母年九十三卒初母有義女欲配之智曰旣稱

兄妹不可亂終貧不娶里皆名爲范孝癡

徐應徵父梧官烏程教諭空囊歸盜疑有蓄夜半劫之徵恐驚父出迎盜罄己橐與之盜猶欲得其父楚掠備至繼以火灼身無尺寸不焦卒不言父所在盜去應徵已死

呂正和字汝通母邁疾呼號禱天至嘔血數升父愛其弟正和推產與之學使旌其孝三與賓筵子逢字錫卿亦以孝聞

黃三讓字汝遜父檠客淮北又生子不欲歸三讓走千里迎還析產厚其弟萬歷中賜章服

江陰縣志

卷六

人物 孝弟

五

於化民字帖懷四歲而孤奉母繆氏竭盡誠孝當事疊加崇獎

繆鍾理字守恆幼失怙恃事祖至孝祖患奇疾思飲鹿血鍾理焚香祝天刺臂血盈盞以進祖飲而甘之遂愈又八年卒鍾理居喪哀毀咯血數升生平多焚券讓田之事善醫著化機淵微二卷

王湛盧字用予諸生母毛氏早寡教湛盧勤讀夜常達旦母死旣葬晨夕繞墓哭竟以羸毀卒

管孝子名不傳十歲失怙孝子朝夕籲天乞益母算貧不能娶躬自執炊勉求甘脆以進三十餘年如一日母以

壽終既斂孝子慟哭七晝夜眼血流地竟死棺傍

李 御家貧躬耕養母母嘗病瞽御禱於天久之復明崇禎年旌

徐時進字元修諸生博學能文事親養志餼廩脩脯悉以奉父父一擲輒盡又曲貸佐歡母喜女若甥俱養於家母卒號呼擗踊痛不欲生越七日一慟仆地不起遠近哀之

韓廷美字奉泉性純孝父疾衣不解帶者二年復患惡瘡口吮不以爲穢嘗服賈於外發布貨五百金付農戶旋值水災曰予向鳩形鵠面之人索前逋不忍也悉火其江陰縣志

卷六

人物

孝弟

五

券而歸

徐紹宗字慕疇父入蜀不返紹宗徧訪十餘年始遇於夔州奉節縣痛哭迎歸中途父疾作卒負喪歸撫棺哀號數日而卒直指旌其門

劉光祖字榮先好學能文兼以工醫多活人侍父疾衣不解帶有友寄千金遠遊者被兵火金亡友歸變產償之子于皋品詣純粹亦有父風

國朝陳其忠字丹忱至性過人家貧授徒以養父母患痼疾衣不解帶者經年母歿擗踊幾絕寢苦枕塊衰麻哭泣一如古喪禮祭必竭誠晦朔必宿墓廬號慟康熙年旌

葛撫辰字全五增生父雨新爲宵人戕斃撫辰臥薪枕塊
控官復讐養母先意承志推產與羣弟復撫育其姪以
成立

周士鏗字品三父御階命服賈乘間輒歸省曲致奉養嘗
隨父索逋揚州典衣供膳而自忍餓衣盡委頓草間得
遺金乃奉父歸父疾顛天泣血願以身代跪進藥父飲
之覺有異香遂瘳母患瘧痢垢穢必親浣濯歷三年不
倦父母歿哀毀骨立廬墓終喪仍出賈春秋必返設奠
墓所愛慕如生時

黃文羲字麗華家貧力耕以糠粃自食養父母必有酒肉
江陰縣志

卷六

人物 孝弟

卒

薛雲開字大文監生性至孝嘗隨父渡江遇暴風雲開涕
泣呼天祈脫父難舟幾覆而免父卒廬墓三年 以上
乾隆年旌

夏禹鈞字欽和父卓之好潔飲食必親調父疾糞溺汚牀
席躬爲拂滌少精醫延診者無虛日以侍父故力辭閒
有急而求者必計程數里內者應之遠卽不往也

章德培字上之家極貧母王氏早寡奉養盡孝以販蔬爲
業得值養母每飯必具腥夕必設酒凡事必求其喜悅
偶醉與人忤或叱之曰訴汝母卽斂手退惴惴然惟恐

母知而怒也歸則跪伏母前時伺飢飽寒燠以爲常母
壽至八十餘

陸祚昌父歿廬墓期年妻閻氏明典史忠烈女亦善事舅
姑

徐來清字頌穆順治壬辰進士篤於天性偕兄原博共飲
食同臥起將與計偕念二親不欲行父強之促裝旣得
部曹觀政三月父母與兄相繼歿哀痛奔歸喪葬訖毀
至滅性遐邇共憐其死孝云

陸利字思義少孤貧舌耕養母母亡哀毀骨立旣葬匍
匍冢旁哭日母在此兒安忍去眾迫之歸勿聽且日必

江陰縣志

卷六

人物 孝弟

空

欲歸我我其奉母於泉下眾感歎爲壘石作室使可坐
臥間出爲童子師每風雨獨攜一穗火走數里就廬以
宿數見長蛇而墓下不爲懼又有白兔朝夕如送迎者
居八年以死

陳增字益侯家極貧竭力以供甘旨母病躬親湯藥日
夜不離及卒泣血吞聲懼傷父心父性喜燕飲每集親
朋家增潛伺門外俟父出執燈扶歸父歿廬墓三年晝
夜哀號兩目失視未幾復明僉以爲孝行所致

趙調鼎字羲文父海若以連坐繫獄死母遣配瀋陽調鼎
請隨行法不可後聞軍配老者例得還籍乃徒步跡至

古城屯始獲見母屯人索百金方聽歸調鼎空囊襍被
惟持母號泣而已或見而憐之榜於市醵金數十錠飲
之始得歸日負母行三十里體素羸朔風寒雪肌肉凍
裂血流至足值母病畱都下半載調鼎抵家告貸迎以
歸時年七十餘矣居一歲卒計往返萬六千里人咸稱
萬里尋親趙孝子云

徐尙懋字岐洲父應集爲盜劫盜黨行賄坐誣遣戍嶺南
尙懋請以身代居戍所二十餘年赦歸授徒以終

沈濮遇字振公庠生父患瘋疾起居抱持嘗含哺飼父及
卒哀毀踰禮終喪不入內室友愛其弟撫姪授室人無

江陰縣志

卷七

人物 孝弟

三

間言

葉子芳父玉林貿易廬鳳間中途被盜流滯江湖者十年
子芳子身萬里尋父遍歷西江閩粵至浙中遇於餘姚
逆旅奉之歸以積勞邁疾卒父年八十餘每向人言父
子重逢時事聞者皆爲泫然

蔣之傑字漢卿庠生父邁奇疾嘗藥視糞病七年卒晝夜
哭踊盡哀

湯肇元字臣尹庠生事親孝父病日將瞽親爲之舐一年
而目明弟爲邑豪所陷文致大辟肇元盡產營救得雪
人多其才或勸之科舉曰昔乙酉兵變閩公集眾守城

嘗招我矣我以父老爲辭今應科目是負閭公也卒不
赴試

徐鳳梧字初羣父喜任俠鳳梧曲體養志母以勞得疾侍
奉湯藥旦晚不懈哀禱於天願減算以益母母畏寒每
夕捧母足臥母亡逾年卒

包廷贊字貢卿與妻潘氏孝事嗣父母父母怒夫婦跪勸
至色霽乃已父亡母日瞽臥床十年侍湯藥極誠

季兆斗字星燦母年六十疽發背將死兆斗同妻顧氏互
吮膿血晝夜衣不解帶母獲痊

王士奇父邁危疾號泣籲天願以身代潛割左股進父病
瘳越七日士奇竟歿時年甫十六

江陰縣志

卷六

人物 孝弟

三

趙氏龍字德公庠生母病一月穀藥不嘗氏龍割股給以
鹿肉進之頓愈

江士列庠生割股療祖父疾

夏 霈字若時庠生維新子有孝行遇親諱日素服齋居
泣涕竟日

黃 覺初名大澳字子瞻庠生父毓初早卒事母盡孝母
卒早夜呼號淚繼以血後伯父毓祺事發或勸之避泣
曰避將安之且伯父徒以有明六十年老諸生自求就
死鞫者得情當不及族族亦命也今伯父家昆季俱就

逮微覺誰視獄者乃詣金陵納橐餽匍匐周旋不避艱險及讞定隱居定山粥糜不給研精經史著有靜學齋集詩通內篇外篇雜篇宋後史各若干卷

陳芝英字英儒明時子明時患痢中裙廁踰手自湔滌與兄芝芳友愛不異產嘗纂修邑志取明季迄康熙甲寅五十年事孜孜搜討意在表微闡幽未竟而卒卽沈志所據本也著有深柳堂詩文集又輯江陰詩粹

沙際燾字元文庠生少時讀書一覽成誦兼析其義與李宗泌邢孝儀夏敦義稱四神童稍長言笑不苟動以古人自期居父喪哀毀踰禮事後母以孝聞

江陰縣志

卷七

人物 孝弟

畜

王 沐字聖瀉增生痛父少孤早世事祖母及母孝養備至其學博綜典故邑令延主經學於後進多所造就

許

觀 見鄉賢

吳 琳字葉書庠生篤於倫紀弟衡友出爲叔後請父析產與弟均衡友早世撫其孤如己出婦周氏亦善體琳意孝事舅姑父母歿徒跣二百餘里丐文以誌親行生平力學博覽著有周易講義十卷

繆

炗字雯遂監生幼失怙母常臥病日夕奉湯藥積數十年無倦色與兄炆友愛甚篤炆遭疾姪復天撫姪孫成立又鄰有鬻婦償逋者捐貲代償有舊家女急難售

宦族爲贖還擇配

張士俊字爾玉乙酉之難父母出避於外士俊偕兄士偉弟士僕守城城陷士偉士僕殉難士俊抱家祠木主從火中出額背焦爛求得父母盡力維護性尤慷慨歲饑自外郡載粟二百石歸盡散之

楊履泰字紫來乙酉之難時年十五隨父起鯤出避中途相失負母匿江邊蘆葦中忍飢累日旣與父遇渡江舟覆比遇救母氣已絕履泰悲號欲赴水死起鯤止之乃負母屍葬焉事父孝謹與弟履謙履恆友愛甚篤

邢鼎卿字元甫偕其兄弟扶母避難城南兵至以身蔽母被七創母獲全鼎卿絕而蘇兄弟負以逃其創潰忽一人授藥寸匕糝之立愈

王廷璜一名錫瑞父佩林緣前縣虧帑事與母徙配長安瑞時年二十餘在家悲泣思慕越二十載往配所尋親得見父悲母已死號慟欲絕負骨歸葬明年復往父已衰病不能充伍請諸當事乞領歸許之背負其父歸晚年遂患足跛不能行

徐世啟字爾正庠生當順治乙酉江陰守禦兵未撤馬有遊牧於野者世啟弟世美方總角見之騰而上騎卒挾之去母陳痛幼子之被掠也晝夜哭無時日遂瞽時家

赤貧世啟方以營作謀養不能遽離母及遊庠娶婦乃告母曰母無憂弟苟在兒必挈之歸遂由江沂淮抵山東凡屯衛之所皆踪跡之無所得返之金陵忽遇於城下相與抱持而泣因偕往主人所告以誠乞攜歸不許乃返贖金往贖歸母喜極而哭哭已拭淚目頓明如初吳德名母早卒父聲起病篤夜禱於北辰願減己年益父算割股以進父尋愈

邵沅芳以牙戶爲業母病篤割股和藥療之

黃壽字聲遠母早卒傭力養父遇酒肉輒攜歸所傭不出鄉里雖厚其值亦不遠去欲便於侍養也父卒後自

江陰縣志

卷六

人物 孝弟

六

痛奉養之薄不復近酒肉劉文定題其門曰暨陽雙孝謂與其族弟文義也

程士誥字紫書早失怙事母孝課徒養母母病衣不解帶居喪盡哀

許維峻字宗嶽世業醫事母孝所受值悉以奉母不私一錢母卒廬墓以終

張源深字增霖母病瘡割左膊肉煎湯以進母旋愈又十二年而歿

吳有章字文煥課徒養母天寒每夜必自館舍歸爲母溫其被有相者告以色不善有章以不獲侍養爲憂涕泣

禱於天一夕行至縣治前石坊驟傾去身尺許竟得免人謂爲獲天佑云

樹雲榛隨父卓如夜行父失足墮溪中欲救無策卽自投於溪抱父屍死道光丁未學使李煌給殮身全孝額

林廷佐業農父病劇割股肉以進立瘳逾十載終

金猶龍字子逸增生幼失怙事母孝母老病虔奉湯藥衣不解帶者數年一日母病驟危割股煎湯以進母病卽瘳

曹鳳嬉少孤家赤貧行乞養母得食必先歸奉母雖腹中極飢不忍食必問母已飽然後食或憐其孝與之肉持

江陰縣志

卷六

人物 孝弟

七

以歸如是者幾二十年及母卒負土成墳於墳旁築一土室終身居之

沙烈宗字仲裘兄復宗弟昌宗同殉乙酉之難烈宗奉母出避備經艱險母賴以全事平歸恢復始祖武畧將軍原德賜宅

張昇法業農父母旣葬廬墓三年

汪步仙字右銘甫三歲父誠遊幕閩粵絕音問年十七攜一繖一楸徒步由浙入閩尋父再入粵歷海之瓊崖病臥經旬夢神指示赴某處果與父遇隨侍三年偕歸後父病危焚香禱神割膺前肉煎湯以進父甘之漸愈而

步仙創亦平

蔣漢惠字志隆父永忠病焚香祝天齧臂肉和藥以進母
歿廬墓三年

謝霖字東緯善醫父邦基病諸醫治罔效霖修方禱於
神刺臂血和劑以進病尋愈母患四肢麻痺起臥扶掖
往往自夜達旦

夏鴻軒字承芑庠生母歿臥宿棺旁至終喪父敬授邁痢
疾侍湯藥滯穢溺衣不解帶者三月父歿一慟而絕急
救乃甦

祝璿墀字廷輝監生祖朝樞患鼻淵目疾每夜必籲天祈
江陰縣志

卷六

人物 孝弟

奕

禱逾年朝樞夢人鍼砭之兩疾並瘳祖母病劇焚疏願
以身代夢人指示某處有妙藥訪投果效

曹茂春吳氏僕也甫三歲其父遠逸母守主家茂春長聞
父在閩泣辭母齋五日糧攜一襲衣出尋父抵衢州過
仙霞嶺薄暮遇虎直前叱之虎帖耳去遂抵福州初其
父至閩投督標下會臺灣生番越界調往征之有功歸
多獲賞賚復娶妻生二子置產土著畱茂春數月遣歸
迎其母遂返白父命母不可再往復命於父則父死矣
後母挈其弟改適臺灣茂春渡海抵臺尋訪遇之詢父
葬處後母言在某鄉某邱茂春欲挾弟歸後母不許復

渡海至閩謀負父骨歸葬至其所墓無封識卒莫能辨
悲號行乞歸主高其行脫僕籍

金 慶王氏僮也性至孝其主貧不能畜慶乃奉其父別
居父年已踰艾不勝事慶進饋必精腆父每自外歸色
不懌必進酒令歡而後已如是者二十年父卒每食必
奠奠必呼其父如生時奉養狀 以上道光十八年彙
旌曹茂春金慶照例停止設位

未祀孝弟傳

宋蔣九成字君韶母患目疾逾年九成哀禱於天叩頭流
血寒夜揮淚成冰母目旋愈九成歿子四人恭良謙讓

江陰縣志

卷六

人物

孝弟

堯

廬墓期年有紫芝生豕之異

元邱定夫字景游授武龍州同知以疾辭與兄揚州教授
立夫字景唐弟淞陽縣丞介夫字景南同居友愛爲時
所稱子堅基皆以文學世其家

惠希孟字秋厓兄希顏弟希點皆無嗣希孟奉兄撫弟篤
愛無間著有易象鉤元十卷雜禮纂要家範五卷

惠 連字子及至正間奉母避亂吳下備歷艱險王逢作
惠孝子詩贈之

明季 葵字子忠敦行孝弟能以菽水得親歡設教里中
尤嚴於督子子科旣貴布素如故

黃道字吉甫鑿子樂善好施慷慨一如其父鄰里待以舉火者數百家事親孝撫兩幼弟如子友人徐汶族兄珽死並收其遺孤子之著有燕山白下寄潤游魯樂菴畫眉折柳諸集

許道字汝達歲貢生任聞喜縣丞事後母曲盡孝養子學閔亦以孝聞學夷別有傳

張嘉孺字元禮衮孫監生事母至孝直指郡守邑令俱旌之

邢緯割股療母病嘗同弟服賈弟折閱推己資與之舅氏錢元罹罪所司欲加以刑緯奮身請代卒獲免人皆

江陰縣志

卷六

人物

孝弟

七

義之

朱家相字章甫諸生事親恭謹而飲酒無量父疾革瞠目不語家相跪請所欲言曰汝能戒飲吾卽瞑矣遂泣拜斷酒終身涓滴不入口家素貧盡誠養母母亡絕粒三日待兩弟亦篤愛

李應炅字伯發諸生忠毅兄也忠毅被逮炅護送三千里比下詔獄納橐餽候起居染疾幾殆無倦色忠毅斃獄中遺骸三日始出手捧辨視而後斂徒步扶櫬歸崇禎初匍匐訟冤請卹應昇歿父封太僕鵬翀得優游林下以全終者應炅養志力也母歿後遇忌日哭過哀咯血

卒妻徐氏亦以哭姑喪明

陳大才七歲父死孝事其母以壽終

黃之量病濕傷足扶持至九旬而歿

薛 仰偕兄弟力穡養親爲人敦慤不苟

任 俠字五游庠生貧而力學廬父墓割股起母疾於衰
年

陳涪卿訓徒給養父母病一再割股療愈

宋昌武割股療親以壽終

趙兼聖孝子鉉後割股療父疾人稱爲小孝子

陸 策以割股孝行有司給粟帛二十餘年

江陰縣志

卷六

人物 孝弟

七

馮大同字與和躬耕服賈養孀母割股療病邑令聞其孝
致賓筵

俞治倪誠王正宗王之綱皆以割股稱孝

許 誥八歲割股療母疾邑令宋光蘭給額曰孩心純慕

徐 標諸生與弟玉光皆少而死孝人咸惜之

繆希孟希曾讓宅焚券以孝友聞

夏汝復字仲修父石涯生六子汝復幼出爲朱氏後石涯
被罪將遠戍諸子擁園扉俟父出汝復從眾中抱父足
哀號乞身代有司爲更檄具其事遣之軍吏覩檄歎曰
此孝子也縱之歸旋喪母諸子分母橐以仲兄出後叔

氏故不及汝復卽讓所受

王大成弟天有遺腹子大成厚撫之終身不析箸

陳鳳鳴善撫異母弟妹以誠懇見重

鍾子和八歲喪父弟子諧甫四歲就養於舅氏稍長攜歸終身同爨

仰文才字士奇孝事孀母四十餘年撫孤姪周卹兩貧妹耄而不衰

許讓字遜夫善事繼母友愛幼弟酷貧而介親知憐其窘周以一金經年還之居恆斷炊課讀自若

黃三傳字汝經慷慨好義兄三道無妻子三傳侍養甚謹

江陰縣

卷六

人物 孝弟

三

兄未食不敢先歲歉捐粟賑飢全活甚眾

徐沾字伯宏徐與沐字仲揚兄弟孿生均有孝行嘗讀書僧寺暮必歸省爲父濯溺器整牀褥始攜膏油以行兄弟食不異席出入必與偕比與沐登鄉舉愴然不豫兄問故曰吾兄弟不離跬步今將獨上公車用是怏怏耳遂罷會試越三年沾亦捷沾任溧水教諭偕弟行終身不析爨

徐子忠字懷月與弟仰月友愛篤摯終身不異爨

陳明時字汝良諸生博綜經史尤精易學象緯輿圖多所通曉少爲尹嘉賓高弟父被冤請身代囹圄猶晝夜誦

習不輟當事者察其冤白之後兄弟分財以腴產讓諸弟自取瘠田數畝曰得無飢足矣性耿介不喜貴游爲人師規言矩步著有息菴詩文集天文管窺羣芳集諸書子芝芳芝英以詩文名芝英見崇祀孝弟傳

季 宜字汝義參政科孫科子同寅生宜科命爲長子同春後時同春已病革宜年甫十三同春握手作永訣語宜卽哀痛欲絕居喪如成人孝事孀母不貽母纖介憂比長會文他所或夜雨衝泥歸過寢室必釋屣行懼驚母睡也奉所生父母不以爲人後殺恩禮待兄弟篤愛無間

江陰縣志

卷七

人物 孝弟

三

張 某失其名青陽里人業屠狗父母老而好飲某日沽美醞鼓腹吳謳舞蹈以侑觴父母歡然酣醉乃休親年皆九十餘歿晨夕思戀悲不自勝

國朝繆懋時字養真鍾理子崇禎時邑大疫懋時施藥療治全活無算天性孝友家產悉讓昆季兄早歿養寡嫂二十餘年撫諸從子女婚嫁皆盡力

費拱垣事父母衣不解帶父歿勉力爲善修整慈航等橋六座復鋪砌石板路自圓通庵至板橋行人便之

劉憲名事其兄憲章誠愛篤謹七十同居舉鄉飲賓

吳斌字鼎玉康熙戊午舉武科具至性孩提喪母終身思

慕事後母孝養備至妹適貧士給田贍之從弟雲卿歿遺孤二撫之成立

郁謙徵字益之天性醇篤父涉訟幾瀕於危謙徵鬻己產匍匐籲當事寃得白父歿傾貲治喪皆不以累兩兄兄弟怡怡然疾革遺命諸子竭力修建宗祠捐祭田鄉里翕然稱之

繆民埴字虞陶幼失怙恃叔燧撫之及長事之如父所爲必稟命而行叔父母歿服三年喪諱日及父母諱日素服涕泣減食居家言笑不苟訓子嚴而有方與人交坦率簡易親族貧乏者周之無吝色

江陰縣志

卷六

人物

孝弟

七

董繼善家貧無以養母傭於人久之置屋二楹田二畝力耕以備甘旨及娶婦弗善事母繼善恚甚母卒棄家爲僧

陸日森字允明雍正間自常熟徙江陰父母俱年九十餘家甚貧甘旨不少缺嘗隆冬寒凍母病思魚日森詣河畔跪拜禱祝敲冰網之竟得魚以奉母母病隨愈孫正繁字秀芝亦廬墓稱孝

潘君信早失母與婦某氏俱孝其父有風疾置鉦於帷中有所欲鳴之君信夫婦卽至日或十數次無不應者父病少瘥扶杖出必奉以錢財給所需或召父所素契者

治具歡飲以爲娛父卒哀毀骨立

鄒玉珩父戍甘肅玉珩奉母以從及父歿收骸骨行乞奉母歸

馮 二農家子九歲父死族人議嫁其母以買棺二兄大郎年已十三唯與母抱持泣二憤然大慟曰母生四子嫁則骨肉星散矣賣我可也因自鬻柴氏得以葬父數年自贖以歸

胡 遂字容照幼失怙母病癱瘓遂謂諸兄資館穀以爲養侍奉之事弟獨任之由是日夕侍母起居飢渴扶掖調護惟謹浣滌穢溺亦躬親之如是者十九年母以壽

江陰縣志

卷六

人物 孝弟

七

終

嚴斗林三歲喪父母朱苦志紡織斗林拾薪以養十一歲母病癱瘓斗林無可爲計乃求乞得食輒馳歸奉母稍長傭工得值時買酒肉進之而後跳歌於旁每出傭必爲母梳洗滌厠纖屑皆淨而後去以故傭多不終值歲禮仍行乞人憐其孝每以精鑿與之悉以供母其侍母疾積四十餘年晝夜無怠母壽九十一母旣終負土以葬日夕哭於墓旁

徐夢庚字綵江庠生年十三父紫綬繫獄擬遣庚子身匍匐懇大府涕淚橫流求釋父罪得減等改徒

繆克家字振先事母曹氏盡孝母歿廬墓一載每遇祭祀必涕泣追念

徐雲昇字旭初侍嗣父母及本生父疾十九年中凡割股者五有陸姓者染疫方狂呼神附忽跪而叫曰徐孝子至速迎之其家啟戶視則雲昇也

朱咸慶字蔭嘉增生篤學工詩母病割左臂肉以進著有字林正譌二卷小萬卷樓詩文集八卷

楊勳字志高名亡孫幼孤孝事其母家貧率妻子食糠覈而奉母以甘旨母疾思食鮮魚雖暮夜必操網取之或無所得則號哭於河干侍母疾衣不解帶默禱於神

江陰縣志

卷六

人物

孝弟

美

願以身代母旋愈勵以哭父幼得目疾後日益劇恐以昏眊不能終事母哭失聲有表戚憐其志爲之虔禱目復明母後病骨痛晝夜扶持同臥起月餘母卒哀毀骨立思慕終身

趙大慶至性過人幼孤事母極孝中裙廁踰必親爲浣滌營貲爲弟娶婦已則終身不娶母卒結廬墓側寒暑棲宿其中三年不去衰經學使張芾給百行所先額獎之弟大成亦以孝友聞學使青麀給孝弟力田額

郭元亮字際之拔貢生少穎悟能文章八九歲時割股療母疾

陳明元事母至孝母病夫婦並刲臂療之

繆重熙字星熊諸生家貧力學取與不苟嘗刲股以瘳親疾著有檢身集要十二卷桂蔭軒稿二卷

葉鳴霄字來鵬性友愛弟鳴世溺水死鳴霄入水求尸數日乃得壽至八十餘

周賡良字唐士歲貢生殫精爲文有孝行父疾刲股療之歿後事祖母曲承色養終身無間焉

陳樹字均喬太學生好讀書以病不與試嗣胞叔瑛後事本生父母以孝聞殯葬皆獨任之田產悉讓諸弟僅餘隅屋數椽薄田一頃而已同治甲子餘匪復竄以不

江陰縣志

卷十六

人物 孝弟

七

屈死子熙政見父被害奮身往救亦俱死焉

黃桂山秉性純孝年逾五旬負母避寇朝夕不離母歿以哀毀卒學使林天齡獎以至行流芳匾額

陳美堂字協箎謹厚樸誠母病割臂以進立愈

章成達字詒穀廩生性孝友父培慶以吏事被逮率諸弟匍匐撫轅願代父繫血書數百言求白撫軍憫焉嘗兩刲股療父疾邑令金吳瀾貽以孝友堪欽匾額

江陰縣志卷之十六終

